

**SEVENTH LEGISLATIVE ASSEMBLY OF MIZORAM
(TWELFTH SESSION)**

LIST OF BUSINESS

FOR SEVENTH SITTING ON WEDNESDAY, THE 22nd MARCH, 2017
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

PRESENTATION OF REPORTS

2. **Pu R. VANLALVENA**, to present to the House the following Reports of Subject Committee-III :
 - i) Ninth Report relating to On Farm Water Management (OFWM)/National Mission On Micro Irrigation (NMMI) and Pradhan Mantri Krishi Shinchayee Yojana (PMKSY) under Horticulture Department.
 - ii) Tenth Report relating to National Mission on Medicinal Plant (NMMP) under Horticulture Department.
3. **ELECTION TO FINANCIAL COMMITTEE** to elect a member of Committee on Public Undertakings.

FINANCIAL BUSINESS

DISCUSSION AND VOTING ON DEMANDS

4. **Pu ZODINTLUANGA**, Minister to submit to the vote of the House various Demands under his charge.
5. **Pu JOHN ROTLUANGLIANA**, Minister to submit to the vote of the House various Demands under his charge.

NGURTHANZUALA
Secretary

.....

SPEAKER : “In pi leh pute hnenah chhechhama thu thlun chu tihnghehna turin in Pathian chu hre reng rawh u, sum leh pai deh chhuah theihna petu che u chu amah chu a ni zawk a ni.”

– **Deut 8:18**

Le, Starred Question No.64 na kan la ang a, question neitu MLA zahawm tak Pu Lalruatkima ilo sawm ang.

Pu LALRUATKIMA : Pu Speaker, ka lawm e, ka Starred Question No.64 na School Education changtu Minister zahawm tak chhan atan –

- a) Middle School leh High School Lump-sum-grant-in-Aided engzatnge awm? Khawtlangin an enkawl School engzatnge awm?
- b) School enkawl nan hian kum 2011-2016 chhungin engzat theuh nge pek an nih?
- c) Heng School te hi dinhmun tha zawka hlangkai turin ruahmanna a awm em tih ka zawt e.

SPEAKER : Awle, School Education changtu Minister zahawm tak Pu Rohluna chhang turin i lo sawm ang.

Pu H.ROHLUNA, MINISTER : Pu Speaker, member zahawm tak Pu Lalruatkima Starred Question No.64-na chhana chu-

- a) Middle School – 35 a awm a, High School – 27 a awm. Middle School khawtlang enkawl hi 14; tin, High School khawtlang enkawl hi 16. Hei hi ziaka chhanna nen a danglam hret a ni.
- b) Kum 2011-2016 chhungin school pakhat tan kum tinin ` 1,20,000 pek thin a ni. Kum nga ang a ni a, chutiang a nih chuan ` 6,00,000 vel pek ang a ni school pakhat tan.
- c) Heng School te hi din hmun tha zawka hlangkai turin ruahmanna a awm em tih chhanna chu – Heng school te hi dinhmun tha zawka hlangkai turin ruahmanna a awm rihlo tih a ni.

SPEAKER : Zawhbelhna, a neitu Pu Ruatkima.

Pu LALRUATKIMA : Pu Speaker, ka lawm e. Hemi in a kaihnawih tho Higher Secondary School khawtlangin a enkawl zingah lumpsum grant in aided category A kan han tih, khawtlangin a enkawl bik kha engzat nge awm tih leh heng Higher Secondary School bik kum 10 chuang an lo kalpui tawh ang chi ho hi dinhmun tha

zawka hlangkai turin ruahmanna awm sela, priority pek tumna a awm ang em tih ka zawh belh a.

Tin, kan sawi belh duh zeuh chu Pu Speaker a bik takin Higher Secondary School hi kan indaih lo khawp mai a, feeder High School kan ngah si a, admission ah kan buai tlangpui a. Matric result a lo chhuak a, helaiah hian Higher Secondary School Lumpsum- Grant- in-Aided kan neih ho te pawh hi thum that zawk tumna awm em tih kha kan zawt tel a ni.

SPEAKER : Zawhbelhna Pu Rinawma.

Er. LALRINAWMA : Pu Speaker, ka lawm e. Kan zawh belh duh chu zirtirtu transfer chungchangah hian eng chinah hian nge MLA an rawn a, engchinah hian nge an rawn loh tih a ni e.

SPEAKER : Pu Pianmawi'an a phar hmasa a.

Pu R.L PIANMAWIA : Pu Speaker, ka zawhbelhna chu election dawn kumah tun sorkar hian heng dinhmun sang zawka dah ngai zawng zawng te hi order siamin Deficit a ngai a nih leh Deficit, Lumpsum-Grant-in-Aid a dah ngai a nih leh chutiang zawng zawng chu election dawnah hian tun sorkar hian tih ve a tum ang em tih ka zawt e.

SPEAKER : Pu T.T Zothansanga kan sawm ang a, i duh tawk tawh ang aw, hei a tam tawk tawh dawn, chuan Minister in a chhang ang. Zawt rawh.

Pu T.T ZOTHANSANGA : Pu Speaker, inthlan dawn boruakah khatiang tih tumna kha a awm ve em tih kha kan tum a ni.

SPEAKER : Awle, Minister zahawm takin chhang se a zavai khan.

Pu H.ROHLUNA, MINISTER : Pu Speaker, a zawhna neitu member zahawm tak Pu Lalruatkima, Higher Secondary School Lumpsum Grant grade- A chungchang kha chu zawhna rawn thehluh a awm a, hei hi a la chhuak lo a, a chhuah hunah kan inchhang dawn nia.

Tin, a zawhbelhna pahnihna heng school te hi khawtlang din leh pawimawh tak tak te a nih avangin sorkarin priority a pe thei ang em? Tih chu sum dinhmun te pawh en a ngai anga, sorkarin hei hi chu a tlin tawk ang zelin a enkawl chho rih a ni tih kha ka chhanna ni mai sela.

Tin, member zahawm tak Er.Rinawma zawhna kha, zirtirtu transfer chungchangah MLA te engchin ah nge rawn an nih tih kha a theih chin chin ah kan rawn a ni.

Tin, member zahawm tak Pu R.L Pianmawia zawhna election te a lo hnai chho tawh a, election dawnah hian an dinhmun te, lumpsum grant a ni emaw, Adhoc-Grant-in-Aid te a ni emaw; tin private te thleng pawhin a nih ka ring a, dinhmun tha zawka hlankai tumna awm em tih hi tun dinhmunah chuan ngaihtuahna sorkar in a la seng lo a, 2008 ah tute emaw an sorkar lai hi chuan khawtlang enkawl pawh ni lem lo te, private te pawh kha mimalin an enkawl te thleng pawhin chutiang chuan an lo ti a, a hnu lelah sorkarin phurrit nasa tak an neihte hi kan la hre rengin ka ring a, vawiinah khatiang em kha chuan kan sorkar chuan ngaihtuahna kan hman ka ring lemlo. Tin, Pu T.T.Zothansanga zawh belhna pawh a chhangin ka hria, Pu Speaker.

SPEAKER : Awle, zawhna no.65-na neitu Er.Rinawma i lo sawm ang.

Er. LALRINAWMA : Pu Speaker, ka lawm e. Power & Electricity Department changtu Minister zahawm tak hnena ka Starred Question no.65-na :-

- a) RGGVY Scheme hnuaiyah Mizoram khaw engzatnge electrification hna thawh a nih a?
- b) Hna te hi thawh zawh tawh a ni em?
- c) Tun dinhmunah contractor ten khaw engzatnge Department kutah an hlan tawh?
- d) He Scheme hnuaiyah hian Mizoramah BPL chhungkaw engzat hnenah nge electric free connection pek a nih?

SPEAKER : A department changtu kan House Leader Pu Lal Thanhawla chhang turin i lo sawm ang.

Pu LAL THANHAWLA, CHIEF MINISTER : Pu Speaker, member zahawm tak Er. Lalrinawma zawhna chhanna chu, pawn lam atanga lo ngaihthla tute hriat atan-

- a) RGGVY Scheme hnuaiyah Mizoram khaw engzat nge electrification hna thawh a nih tih a ni a – Rajiv Gandhi Grameen Vidyutikaran Yojana scheme hnuaiyah Mizoramah khua 175 ah electrification hna thawh a ni.
- b) Hna te hi thawh zawh tawh a ni em? - Hna te hi thawh zawh a la ni lo.
- c) Tun dinhmunah contractor ten khaw engzatnge Department kutah an hlan tawh? – Tun dinhmunah contractor ten khua 153 Department kutah an hlan tawh.
- d) He Scheme hnuaiyah hian Mizoramah BPL chhungkaw engzat hnenah nge electric free connection pek a nih? – He Scheme hnuaiyah hian BPL chhungkua 26210

(Singhnih Sangruk Zahnih Sawm) hnenah Electric Free Connection pek an ni tawh e.

SPEAKER : Zawhbelhna, Pu Rinawma.

Er.LALRINAWMA : Pu Speaker, ka lawm e. Ka zawhbelhna:-

- 1) Engvanga hna te hi thawh zawh la ni lo nge an nih?
- 2) He scheme atan hian sum engzatnge sen a nih tawh a, central leh state-ah engzatnge sen a nih, atira ruahman bak sen belh a awm em? Awm ta se, engzatnge sen belh a nih?
- 3) Eng hunah nge thawh zawh beisei a nih?

SPEAKER : Pu Pianmawia'n a phar hmasa.

Pu R.L. PIANMAWIA : Pu Speaker, ka zawh belhna chu heng thawk tur hian tute nge contractor tih leh hna heti taka thawh zawh loha a awmna chhan hi he RGGVY lo chhuah tan tirha a bul tanna sorkar khan a thawhna tur pawisa zawng zawng atanga zaa sawmriat pek lawk vang a ni em tih ka zawt e.

SPEAKER : Pu Beichhua'n zawt belh leh se. Tikhan duhtawk ang aw.

Dr. K. BEICHHUA : Pu Speaker, hmanni khan Tawngkawlawng leh a chhehvel ka va kal a. Khawvel pian tirh atangin light an la hmu lo ang deuh titih a ni a. Kan Speaker zahawm tak bial hi a ni a, chair lamah a thu a, a ai ah kan zawhsak teh ang. Tawngkawlawng leh a chhehvelah hian he Scheme hi pek ve an ni em? Ni lo ta se engatinge tih ka zawhna a ni e.

SPEAKER : Awle, duhtawk ila. House Leader sawm ang a chhang turin.

Pu LAL THANHAWLA, CHIEF MINISTER : Pu Speaker, contractor-te hi ka interest vak lova. An hnen atangin pawisa naia sen khat pawh 1984 atang khan ka la la ngai lova. Tute nge an lo ruat pawh hi, an hming pawh hi ka hre lova. Mahse, kan lo kir leh hma 2008 hma atanga an lo ruat tawhte kha an ni a. An thawh chak loh lutuk avang hian Department hotute hi nawr turin ka ti reng a ni, an thawk chak lo lutuk a. Chuvangin kan Department Head te leh a Secretary te hnenah hian chak thei ang bera nawr tur hian ka hrilh deuh reng a, nawr pawh an innawr deuh reng a. Chuti chungin tun hi a la ni ta a ni.

Sum sen leh ilo lampang kha ka inpuahchahna lam a ni lova. An hriat duh tur awm zawng zawka kha kan tih hmasak a ni a. Tin, Zoram pumpui tieng tura tih an ni

a, Tawngkawlawng bialah te pawh an la thleng dawn a. Tuna awm danah chuan hemi RGGVY hnuaiiah hian khaw 22-ah hna hi la zawh loh a ni chauh tawh a ni. Kan innawr chak hle chung pawhin hei tun kan lo kir leh hnu pawhin kum riat vel zetzawt chu a ni tawh a, Nawr chung pawhin tiang kha an ni. A thlak ngaihna a awm tawh lova, tihdanglam ngaihna a awm tawh bawk si lova.

Tin, he Scheme hnuaiiah hian BPL chhungkua sawi tawh ang khan 26,210, chu chu District wise-in a free-a pek an ni a. Saiha District-ah hian 2582 pek an ni tawh a. Lawngtlai District-ah 3678, Lunglei District-ah 5428, Serchhip District-ah 381, a hminga ka bial ve chu a tlem hle mai. Champhai District 5982, Aizawl District 3211, Mamit District 3360, Kolasib District 1588. Hengte hi RGVY hnuaiia BPL free power pek awm dan a ni.

A hna hi a muang a, kan la innawr mek zel a, tin hmun thenkhatah chuan a local village authorities-ten an lo cooperate vak mang lohna te a awm bawk a. Khatianga cooperation pe a anni te nena insawi rema khatia thawk tur kha an ni a. Chungah te chuan inrawlh tulna chang te a awm thin a. Chungte vang chu a ni a, mahse a tlangpuin an thawk chak lo hrim hrim a ni, tih vak ngaihna a awm lo.

SPEAKER : Awle, zawhna No. 66-naah kal ila. A zawhna neitu Pu John Siamkunga zawt turin i sawm ang.

Pu JOHN SIAMKUNGA : Pu Speaker, hon'ble Minister, Soil and Water Conservation Department chhan atan heng zawhnate hi ka zawt e.

- a) Soil and Water Conservation Department hnuaiia NLUP Trade hrang hrang awm zat te min hrih thei em?
- b) Soil and Water Conservation Department hnuaiia NLUP trade tina beneficiaries te hnena sum pek chhuah tawh total amount min hrih thei em? (2012-2017 thleng)
- c) Area cover zat leh Trade hrang hranga hmasawna lian zualte min hrih thei em?

SPEAKER : Hei hi a Department changtu Minister zahawm tak kha kan Chief Minister hi a ni nghal. Amah i sawm leh mai ang.

Pu LAL THANHAWLA, CHIEF MINISTER : Pu Speaker, member zahawm tak Pu John Siamkunga zawhna chhanna chu:-

a) Soil and Water Conservation Department hnuai NLUP trade hrang hrang awm zat chu hetiang hi a ni:

i)	Hmunphiah	-	8364
ii)	Rubber (Thelret)	-	1433
iii)	Coffee	-	1642

A vaiin benefeciary hi 11439 an ni.

b) 2012 – 2017 chhunga Soil and Conservation Department hnuai Beneficiary te hnena sum pek chhuah tawh zat chu cheng nuai 9068.3036.

c) Area cover tawh zat chu 11439 Ha. a ni a, Rubber leh Coffee te hi an la thar lova, Hmunphiah (Broom) erawh chu thar chhuah tawh niin, tun thlenga thar tawh chu 350417.34 qtls a ni, Pu Speaker.

SPEAKER : Zawhbelhna a awm em? Aw Pu Ruatkima.

Pu LALRUATKIMA : Pu Speaker, kan Minister zahawm tak khan hmunphiah beneficiaries kha ka hriat sual loh chuan 8364 ti khan mi chhangin ka hria a. Chuan Rubber-ah khan 1433 beneficiaries tih kha a ni a.

Pu Speaker, nikum March ni 31-a Assembly Session Starred Question nen khan beneficiaries kha a inthlau ta lutuk a, a hniam ta daih mai a tuna a chhanna kha nikum lam aiin. Hmunphiah bikah khan 38-in a hniam a, Rubber kha 23-in. Engnge a chhan? Beneficiaries rawn tlak hniamna chhan kha kan zawh belh a ni e.

SPEAKER : Awle, Chief Minister sawm ang.

Pu LAL THANHAWLA, CHIEF MINISTER : Pu Speaker, NLUP hi a that ang hian a beneficiary te hman tha vak lo te an awm thin a. Thenkhat chu an hlawhchham avanga tawp ta te an awm thin a. Tin, thenkhat chu private lo chhiar tel palh te an awm thin a. Tin, thenkhat hi chu an trade an insawn thin a ni. Tin, thenkhatah chuan vanduaithlak takin Line Department hotute hian an trade hi an thlan loh hi lo tihtir luh te an nei a. Chung chu kan inchohui kan inchohui a ni. Chutiang avang chuan hemi a no. hi a fluctuate ang tih ka ring. Tin a tir lamah khan thahnemngaihna avanga Private-a lo ti tawh te lo chhiar tel te emaw tlem azawng an va bel avanga khatianga an beneficiary-a tih tel te an awm a. Chu chu a fair tawh lova hriat avangin a chang chuan kan titem leh thin a ni, trade dang dangah pawh a ni deuh tlangpui a. Chuvang chuan a number hi a fluctuate zeuh zeuh ang tih ka ring a ni.

Tin, ka sawi tak ang khan beneficiary te hi trade danga insawn an awm thin a. Tin, thenkhatah chuan anmahni line dept. officer ten a an lo insawntir te pawh an awm thin a. Tin, thenkhat chu mahni tuina zawng hre manglo, a pawisa tam lampang ni awm a an ngaih lo thlang ve ringawt, ti tha leh theilo, chungte pawh chu an awm ve bawk thin a. Chungte avang chuan a beneficiary hi trade dang dangah pawh hian a fluctuate deuh reng thin a ni.

Tin, member zawttu zahawm takin a a hriat atan tiang hi Soil & Water Conservation Dept. in a hriatpui chin, a tharchhuah dan a ni a. Aizawl-ah 2011-2012 ah 2,453.29 quintal; 2012-2013 ah 4,563.31 quintal; 2013-2014 ah 4,872.94 quintal; 2014-2015 ah 10,159.50 quintal; 2015-2016 ah 14,810.71 quintal a ni.

Tin, Kolasib District-ah 2011-2012 ah 4,281 quintal, 2012-2013 ah 5,899 quintal, 2013-2014 ah 18,398 quintal, 2014-2015 ah 13,446 quintal, 2015-2016 ah 2,43,380.80 quintal a ni.

Mamit District-ah 2011-2012 ah 497.46 quintal, tin 2012-2013 ah 599 quintal, 2013-2014 ah 2,154 quintal, 2014-2015 ah 1,496.60 quintal, 2015-2016 ah 1,535.60 quintal a ni.

Champhai-ah 2010-2011 ah 455.85 quintal, 2011-2012 ah 202.74 quintal, 2012-2013 ah 488.56 quintal, 2013-2014 ah 953.10 quintal, 2014-2015 ah 1,125.50 quintal, 2015-2016 ah 1,224.50 quintal a ni.

Serchhip-ah 2010-2011 ah 680.30 quintal, 2011-2012 ah 771.50 quintal, 2012-2013 ah 812.95 quintal, 2013-2014 ah 997.21 quintal, 2014-2015 ah 1161.50 quintal, 2015-2016 ah 1309 quintal a ni.

Lunglei-ah 2011-2012 atangin an chhiar a, 2011-2012 ah 1,137.60 quintal, 2012-2013 ah 586.80 quintal, 2013-2014 ah 784.58 quintal, 2014-2015 ah 850.60 quintal, 2015-2016 ah 964.92 quintal a ni.

Lawngtlai ah 2010-2011 ah 55.91 quintal, 2011-2012 ah 91.25 quintal, 2012-2013 ah 190.30 quintal, 2013-2014 ah 310.50 quintal, 2014-2015 ah 1,040.71 quintal, 2015-2016 ah 1,030.61 quintal a ni.

Siaha District-ah 2010-2011 ah 7.91 quintal, 2011-2012 ah 12.35 quintal, 2012-2013 ah 45 quintal, 2013-2014 ah 82.10 quintal, 2014-2015 ah 301.89 quintal, 2015-2016 ah 192.99 quintal a ni.

1st Phase leh 2nd Phase beneficiary te hnenah tanpuina hi pek fel vek tawh a ni a. 3rd Phase leh 4th Phase beneficiary te hi final instalment pe turin tunah hian a thuneitute an inruahman mek a ni.

Tin, Mizoramah hian hmunphiah/broomstick hi a tualto a tam hle a. Tam tak pawh tunah pawh hian buaina leh engemaw inhriatthiam lohna te a chhuah phah thelh a. Thenkhat chuan a tualto hi anmahni huan anga sawi a khatianga royalty lamah te pawh pumpelh/escape tum te pawh an awm nual a. Chutiang chuan buaina tenau neuh neuh chu kan nei thin a ni.

Heng atang hian sorkarin a tualto atang hi chuan royalty 1 kg ah ` 7 a la thin a. Tin, private NLUP, anmahni ramchhung ami tak tak te hnen atang hi chuan royalty a la lo a. Amaherawhchu Mizoram pawn a thawnchhuah te atang erawh hi chuan 1 quintal ah tualto an ni e, mimal huan ami an ni e, ` 1 theuh zel lak a ni a. Chutiang chuan sorkarin rualkhai takin chhiah a la a ni Pu Speaker.

SPEAKER : Awle, zawhna no.67-ah kan kal thei ta e. Pu Lalruatkima, question neituin lo zawt sela, i lo sawm ang.

Pu LALRUATKIMA : Pu Speaker ka lawm e. Ka Starred Question no.67 Agriculture Dept. changtu Minister zahawm tak chhan atan.

a) NLUP Line Dept. hnuai trade hrang hrang land based leh Industries and Allied Sector atangte hian tharchhuah/production engzatnge awm tawh? Tharchhuah hlut zawng engzatnge?

b) NLUP trade hrang hrang atanga tharchhuah buaipui tur hian marketing cell emaw a dang din a ni em? Engtingge tharchhuahte hralhna tur hi ruahman a nih tih ka zawt e.

SPEAKER : Agriculture Dept. changtu Pu R.Lalzirliana, Minister zahawm takin chhang se.

Pu R.LALZIRLIANA, MINISTER : Pu Speaker, member zahawm tak Pu Lalruatkima zawhna chhanna chu-

a) NLUP Line Dept. hrang hrang land base leh Industries & Allied Sector atangte a tharchhuah/production assessment hi neih mek a ni a. Impact analysis form hmangin District tin atangin khawn khawm mek a ni. Assessment zawh hunah tharchhuah zat leh hlutzawng a hriat theih ang.

- b) NLUP hnuaiiah Marketing Cell hi din tawh a ni a. Anni hian NLUP tharchhuah man man zawka hralh a nih theih nan Concept Note for Marketing of NLUP Produce pawh an buatsaih a. Anni bakah hian NLUP leh UN thawhhona hnuaiiah marketing promotion atan kawng hnihin hmalak mek a ni-
- i) UNDP nena thawhhona hnuaiiah UNDP in Expert Consultancy Firm a ruai a, report an submit tawh a, an report hi zirchian mek a ni.
 - ii) UNDP hnuaiiah tho Market Task Force din a ni a. Anni hian crop pawimawh bik atana zirchianna leh market tha zawka kalpui dan tur an buaipui mek.

SPEAKER : Zawh belhna Pu Ruatkima.

Pu LALRUATKIMA : Pu Speaker ka lawm e. Impact analysis an ti mek a, chulaiah chuan marketing cell kha din tawh ni khan Minister zahawm tak khan min chhang a. An thiat leh tawh zawk em ni, an thiah leh tawh hnu khan an din tha leh em ni aw tih min hrihl thei chuan, khalaiah khan, a tir ah kha chuan din a ni a, tunah chuan an awm leh tawh lo a, an din tha leh a nih leh nih loh kha ka hre duh a. Tin, Pu Speaker, a dang leh ah chuan, agriculture product marketing buaipuitu tur hian tu te mawhphurh na nge, MAMCO kan thiat tawh si a tih leh Mizoram agriculture product marketing and control rules kan neih kha tu department in nge kengkawh zel dawn tih kha ka zawt tel nghal a ni e.

SPEAKER : Pu Pianmawia'n zawt nghal se.

Pu R.L. PIANMAWIA : Pu Speaker ka zawh belhna chu,

- 1) India ram state dangah NLUP anga mirethei khaichhuahna programme rulh leh ngailo a awm em?
- 2) NLUP kan sem mek titawp turin central sorkar lama hma la an awm tawh em tih ka zawt e.

SPEAKER : Minister zahawm takin chhang tawh mai se.

Pu R. LALZIRLIANA, MINISTER : Pu Speaker, zawh belhna kha, marketing thiat tawh ni in ka hria a ti a, kan thiat tawh a nih pawhin, helaiiah hian concept note an ti a, an tih tur chu an zo tawh a ni mai thei a, chuvangin a hranpa a ngai lo ang a, he concept note an rawn buatsaih hi NLUP atana tha tawk tur a nih chuan tunah hian zir chian mek a ni a, production zat leh a value chhut chhuahna turin impact analysis form siam a ni a, he form hmang hian beneficiaries zawng zawng te production employment

generation leh pawimawh dang dang te la khawm turin Radian Integrity Techno Solution Pvt. Chennai rawih an ni a, an hna hi kalpui mek a ni. Tin, NLUP marketing cell chairman, secretary leh member te hian marketing lam zir chiangin North East India ram hrula land custom station, Agartala, Dharmanagar, Shatur Gandhi, Karimganj, leh Dhoki te an tlawh a, kan sawi tawh ang khan, concept note for marketing of NLUP produce an siam a, an lo siam tawh sa hi tunah hian en mek a ni a, hei hi kan duh chuan kan pe thei ang a.

Heng bakah hian UNDP nen a thawhhona thuthlung kan lo siam dung zuin marketing atan bik hmalakna pahnih a awm bawk a:-

- 1) UNDP kaihhruaina hnuaiah market task force member 4 awmna chu din a ni a, heng mi te hian ram chhunga ram chhunga production chi hrang hrang Mizoram state chhung leh state pawn lama marketing kalpui dan tur an buaipui mek a ni.
- 2) UNDP in expert consultancy firm YES Bank an ruai a, consultancy firm te hian market study leh assessment an nei mek a, an report hi an submit tawh a, kalpui dan tur dapin endik mek a ni. Policy decision siam ngai te, infrastructure development ngai te leh marketing atana tul leh mamawh dang dang te bakah lo leh huan neituten an thil thar atanga hlawkna tha zawk an dawn theih dan tur ruahmanna te a tel a ni. Ti kha zawhna neitu kha ka chhan theihchin a ni mai a.

Tin, MLA zahawm tak Pu Pianmawia zawhna kha NLUP titawp tur hian MNF President leh ani kaihhruaina in party panga dangte khan BJP sorkar tan tirh khan an zu bei a, amaherawhchu chiang taka an han en in retheite chhanchhuahna atan chuan NLUP hi a tha an ti a ni ang, min rawn tihtawp sak lem lo a ni e.

Pu LALRUATKIMA : Pu Speaker, ka zawhna kha, Mizorama agriculture product marketing and control rules hi MAMCO kha kengkawhtu ber an ni thin a, thiah a nih tak avang khan tu te'n nge kengkawh zui ta zel, helaiah hian a chian loh deuh hlek avang khan tu mawhah nge a tluk tak ka'n ti a ni.

Pu R.L. PIANMAWIA : India ram state dangah NLUP anga mirethei khaichhuah na programme rulh leh ngailo a awm em? Ti tawp tura thenkhat, Delhi tlanga mi an zu hekna copy kha member te min sem thei ang em?

SPEAKER : Minister in chhang sela.

Pu R. LALZIRLIANA, MINISTER : Pu Speaker, central sorkar berin tihtawp a ngai lo ve an tih tawh ber chuan khalai kha chu thu tenghneng takah kan ngai a, chuvangin han in sem kher pawh a tul dawn emaw ni le! A tirah khan kan sem darh a, a beneficiary leh midang pawh hian an nei nualin ka ring. Tin, agriculture marketing chungchangah hian allocation business te tun hnaiah tih tawp a ni a, chuvangin tu ber in nge kengkawh tur chiah ka hre lova. Amaherawhchu agriculture hian keng mai sela, a nodal department hian, hei hi chu a tha ber lawm ni tih na te a awm a, chuvangin ruat fel chiah a la awm lo. Tunah hi chuan Trade & Commerce tih awm tak a nih laiin Industry department lamah te han chhun fin a ni leh bawh a, chuvangin helai hi ngaituah chiah, order fel tak chu a la awm lo a ni maithei e.

Pu VANLALZAWMA : Pu Speaker, khatia sawi chhuah a nih tak rau rau chuan a copy kha sem a tha lo maw, House member ten kan neih ve hi a pawh lem emaw ni le?

Pu R. LALZIRLIANA, MINISTER : A tul a nih chuan dap te pawh kan lo la dap chhuak ang a, anmahni kha a hektute an ni a, a hektute zawk khan min sem zawk se tha awm tak chu a ni e.

Pu LAL THANHAWLA, CHIEF MINISTER : Party panga president ten hming sign in ti tawp turin Prime Minister hnenah India sorkar hlim khan an thlen a ni, tih kha thudik a ni a, a copy pawh kan nei hlawm a, a copy an hmu duh a nih chuan an pisa atangin min rawn pe ve nghe nghe se, keini kan pek kha chu a duplicate tawh dawn a, an ni'n original min pe thei ang a.

Pu R.L. PIANMAWIA : India ram state dangah NLUP anga mirethei khaichhuah na programme rulh leh ngailo a awm em?

SPEAKER : Zawhna dang pawh nangmah bawh in i neih a, kal tawh mai ang.

Zawhna 68-na neitu Pu R.L. Pianmawia zawt turin i sawm ang.

Pu R.L. PIANMAWIA : Pu Speaker, Law & Judicial Department enkawl tu Minister zahawm tak chhan atan ka Starred Question 68 na:-

- a) Court a thu hretu (witness) kal man TA/DA te hi revise a ni tawh em ?
- b) Tunah engzat nge a nih ?

SPEAKER : Minister zahawm tak, Finance changtu sawm ang.

Pu LALSAWTA, MINISTER : Pu Speaker, member zahawm tak Pu R.L. Pianmawia zawhna chhanna chu :-

- a) Court witness TA/DA hi a tul dan azirin a khat tawkin revise a ni thin a, revise hnuhnung ber chu ni 7 August, 2014 a ni.
- b) 1) TA ` 2.00 per km
2) DA ` 200.00 per day

Pu R.L. PIANMAWIA : Pu Speaker, 2014 rate tun thlenga hman mai hi chu motor chuan man te a lo pung tawh a, entirnan, keini Darlawn khua atang te in kal dawn ta se km khat a `2/- chuan, Sumo kal man pawh a phalo nasa tawh a ni. Chuvang chuan, vawiin mil ang hian revise leh dan a awm ang em?

SPEAKER : Pu T.T. Zothansanga.

Pu T. T. ZOTHANSANGA : Pu Speaker, Champhai-ah khian tunhma khan Session case hi kan khawih thin a, tunah hian kan khawih thei ta lova. Case lian hi Champhai lamah khian a tam khawp mai a, Aizawlah lak thlak a nih tak hnu hian witness kan kal tha ta lo va, chuvang chuan misual te hi hrem loh in an awm an awm ta mai a .Chuvang chuan Session Court hi Champhai lamah dah theih dan a awm em tih ka zawhna ni a. Tunah khian Champhai District ah Court hmun tur tha deuh kan nei a, a ram pawh compensation tel lovin kan tifel vek tawh a, Zote ramah khian hmalak tumna a awm em?

SPEAKER : Awle, TA/DA atangin Champhai lamah a in sawn a, kha kha Minister zahawm tak in a chhan theih chuan a pahnih khan chhang turin i sawm ang.

Pu LALSAWTA MINISTER : Pu Speaker, 2014 tih kha a nia, a rei tawh a, revise tumna a awm em tih kha vawiina zawhna a awm vang ni lovin, revise tumna hi a awm a, engtikahnge kan revise theih ang tih erawh chu sum dinhmun te en a la tih a ni ang a.

Member zahawm tak Pu T.T. Zothansanga zawhna, Court rorelna hi Champhai lamah han trial thei an awm loh avang khan harsatna tam tak kan tawk thin a. TA/DA piah lamah pawh harsatna tam tak kan tawk thin a, chu chu chinfel theih a ni dawn em tih hi a pawimawh khawp mai a. High Court lama kan Mizo Justice Michael Zothankhuma te hian an ngai pawimawh a kal te pawh an han kal a, khi laia session case try thei ngei tur Court neih dan hi ngaihtuah mek a ni a, tunah hian sorkar in tipuitling turin hma a la mek a ni.

Tin, Champhai ah hmun tha tak kan nei a, hetah hian hmalak tumna a awm em tih kha Pu Speaker, a hmain kan nei tawh a, a hmun a te lutuk a, a tha lo bawh a. Court hi mi tam tak han kal khawm ngaihna a ni thin a, kan duh tawh lo deuh a, hmun dang kan zawng a. Mi tlawmngaite compensation pawh beisei miah lova lo pe thei an awm a, heng hi a tul ang hma la turin sorkar chuan kan ngaihtuah mek a ni.

SPEAKER : Pu Lal Thanhawla, Chief Minister.

Pu LAL THANHAWLA, CHIEF MINISTER: High Court Chief Justice Guwahati in min hmanhmawh pui khawp a, amah ngeiin a hmun pawh a han en ve tawh a. Tichuan, kan Minister zahawm tak nen khilayah kan han kal ho a, foundation stone te phum turin ruahmanna a siam a, min nghak mek a ni.

SPEAKER : Zawhna No.69, a neitu Dr. K. Beichhua, MLA zahawm tak i sawm ang.

Dr. K. BEICHHUA : Pu Speaker, ka lawm e. Starred Question no.69, Law & Judicial Deptt. changtu Minister zahawm takin a chhan atan:

- a) Mizoram Victims of Crime Compensation Scheme 2011 hi hman a ni tawh em?
- b) Hman ni ta se, mi eng zat hnenah nge chhawmdawlna pek a nih tawh?
- c) He scheme hmang thei hi tu te nge ?

SPEAKER : A department changtu Minister zahawm tak Pu Lalsawta i sawm ang.

Pu LALSAWTA, MINISTER : Pu Speaker, member zahawm tak Dr. K. Beichhua zawhna no. 69-na chhanna chu -

- a) Hman a ni tawh e.
- b) Mi 82 hnenah chhawmdawlna pek a ni tawh.
- c) He scheme hmang thei hi tute nge ni, tih chhanna chu: He scheme para no.5 in a sawi angin, thil sual tih tuartu emaw, a tuartu a innghat (dependent) emaw ten a hnuaiia zawm tur hi an zawm chauhin zangnadawmna (compensation) pek theih an ni ang
 - i) Thil tisualtu chu chhuichhuah theih loh a ni emaw, finfiah theihloh emaw, chhui hnu pawha hrem loh a nih pawhin a tuartu chu finfiah theih a nih a, a taksa leh rilru lama natna enkawl nan'n sum leh pai tam tak a seng bawh a nih chuan zangna dawmna hi, Code of Criminal Procedure 1973, section 357 (a)-na sub-section 4-na hmangin a dil a ngai ang.

ii) Thilsual tih tuartu (victim) emaw, zangnadawmna diltu chuan Police station hnai bera officer in-charge hnenah emaw, Magistrate hnen ah emaw, Judicial Magistrate an bial ami hnenah emaw a in report tur a ni a. Tin, inhriattir hun hi a tlai a, a chhan leh a vang tha tak ziaka dah a nih chuan, District Legal Service Authority te'n an ngaidam thei ang.

iii) A tuartu emaw, zangnadawmna diltu chuan thil sual tih chhuichhuah kawngah leh Dan hmanga rorelna ah police leh roreltute a thawhpui tur a ni, tih a ni leh a.

iv) He scheme-in independent a tih te chu an nupuite emaw, an pasalte emaw, an fate chawm lai kum 21 chin, (hei hian falak pawh a huam tel vek), nu leh pa an chawm lai (dependent parents), fanu chawm lai (dependent daughter) leh taksa leh rilru lama rual banlo, (kum engzat pawh ni se), te a huam a ni.

v) Zangna-dawmna chu thil sual tih tuartu leh ama enkawl lai (dependent)ten, bungraw hlutna `1 lakh chunglam an hloh emaw, thihna an tawk emaw, a tuartu chu chhungkaw eizawngtu ber a nih a, thil sual tih avanga piansualna an tawk a nih chuan pek theih an ni ang. Nupui emaw, pasal emaw, thihna/piansualna tawktu chu chhungkaw eizawngtu ber an ni emaw, ni lo emaw, zangna-dawmna hi ama enkawl(dependent) ten an dil thei ang.

vi) He scheme hnuaia zangna-dawmna dil leh dawng theite chu Below Poverty Line(BPL) chhungkua chauh an ni tur a ni.

vii) Zangnadawmna dil theitu chuan thilsual tih a thlen atanga thla 6 chhungin dilna a theh lut tur a ni a. Dilna hi thla 6 chhung a thehlut hman lo a nih chuan District Legal Service Authority ten a chhan ziaka dahin thla ruk dang an pawhsei sak thei ang.

Hetah hian Pu Speaker, mi mawl ve tak tak ten Cr.P.C awm tup mai te hi an hriat ve dawn loh avangin sorkar-in Law lama mithiam te kan pe reng a, chutiang nilova anmahni hian chutiingin an ti si lo va an ti thin a, an chanpual hi chan turah kan ngai lo va, chuvangin kan Law officers ten a tul angin tanpuina an pe thin tih kha ka'n sawibelh lawk a ni.

SPEAKER : Awle, zawhbelhna a la awm ta fo mai a, a chiang viau tawh a ni.

Dr. K. BEICHHUA : Aw, Pu Speaker, ka right a ni bawka, i phal em ang chu maw! India hi welfare state kan nih angin hamthatna tam tak dawn tur kan nei a, mipui hian kan aware lo hian ka hria a, chuvanga zawhna rawn siam ka ni a. Zangnadawmna kan pek ang chi te hi chi hrang hrang a awm thei ang a, thihna thleng thleng chi ah te hian cheng engzat ang hi nge kan pek theih? Chu lo vah taksa tih nat emaw, taksa in hliamna ni lo thil dang bungrua leh in kan in tih chhiat sak te leh thil dang te hi a dil ve theih em tih kha ka zawhna a ni e.

SPEAKER : Awle, a Minister sawm ila.

Pu LALSAWTA, MINISTER : Pu Speaker, tuna zawhbelhna kha pawimawh ka ti khawp mai a. Tin, wawiina zawhna lo chhuak hrim hrim hi zawhna neitu te ang chiah khan pawimawh ka ti a, hre lo tam tak hi an la awm a ni, an lo hriat belh theihna tur a nih chuan thihna a thlen chuan tih te, thihna lo deuh pawl lutuk chi te. India ram hi ram mak tak a ni a, an hmeichhia ten an ngaihzawng te an lo neih duh loh avanga an hmelthatna te han ti chhe vek thei tur khawpa hmaia acid theh ching te kan nei a, chung ang chi ah te pawh chuan compensation hi chi hrang hrang kan nei a. A theih chin chin hi ka'n chhiar ang a, acid attack kan tih ang chi ah te hian cheng nuai thum thleng pek theih a ni a.

Tin, rape case-ah hian cheng nuai thum thleng pek theih a ni a. Tin, physical abuse of minor chungchangah hian cheng nuai hnih thleng pek theih a ni bawka. Tin, nawhchizawrhna lama mihring hruai luh chungchangah hian cheng nuai khat thleng in pek theih a ni a. Tin, mi va pawngsual (i ti mai ang) ang chi ah khan cheng singnga. Tin, thihna thlen a nih chuan cheng nuai hnih. Tin, permanent disability, hnathawk thei tawh lo, piangsual khawpa han in siamna ah hi chuan cheng nuai hnih. Partial disability –ah chuan nuai khat. Tin, kang mei leh mi in hal vak te pawh kan la ching thin a chutah chuan cheng nuai hnih. Tin, loss of foetus-ah (serh lam in sawisak sak a ni ang chu, a nih loh pawhin rai theihna lampang emaw chi thlah theihna lampang te pawh a ni ang a,) hian cheng singnga. Tin, tuna mi kan sawi ang chi bawka, chi la thlah theihna zel tura in suasam avanga chi thlah thei lo tura in siamna ang ah kha chuan nuai khat leh singnga te a ni a.

Tin, cross border firing an ti a, hei hi Mizoram-ah chuan a thleng vak kher lo maithei a, mahse, chutah chuan thihna emaw, permanent disability-ah chuan cheng nuai hnih a ni a. Tin, partial disability a chung ami kan han sawi ang khan hmeichhe chungchang bikah a ni a, nuai khat a ni a. Tin, physically handicap, rual ban lo te, vohbik kan han tih leh mentally retarded kan tih harsatna nei, ngaihtuahna lamah pawh mi tam zawk te tluk ve lo, hetiang rape emaw, sexual exploitation kan tih ang ah hian cheng nuai thum thleng a ni a. Heng kan han tarlan te hi nichian a kan han sawi tawh ang khan tuna scheme awm dan ah hi chuan BPL family te an nih a ngai tih kha a ni a.

S P E A K E R : Zawhna No. 70-naah kan kal thei e. Zawhna neitu Pu Lalthanliana zawt turin i lo sawm ang.

Pu LALTHANLIANA : Pu Speaker, ka lawm e. Niminah khan ka zawhna pahnih-na ka thleng hman lo chiah a, vawiinah hian ka thleng hman lo leh dawn emaw ka ti a, ka lo thaw dep dep a. Mahse, hun tha ka nei a, ka lawm e. School Education Department changtu zahawm tak chhan atan ka zawhna chu hei hi a ni e :-

- a) Kum 1980 hnu lama sorkar-in a rawih Aided Teacher mi 45 tun thlenga la regularize loh te kha tun hnaiah regularize tumna a awm em?
- b) Middle leh Primary School atana contract teacher rawih mek te hi dah ngheh thuai tumna a awm em?
- c) Awm ta se engtikah nge ni ang?

SPEAKER : School Education Minister chhang turin i lo sawm ang.

Pu H. ROHLUNA, MINISTER : Pu Speaker, member zahawm tak Pu Lalthanliana zawhna Starred Question No.70-na chhanna chu :-

- a) Aided Teacher mi 35 leh Non-formal Teacher mi 10 te, an vaiin mi 45 te hi regularize an nih theihna turin hma lak mek a ni.
- b) Tunah hian Primary School Teacher mi 51 (sawmnga pakhat) leh Middle School Teacher mi 79 (sawmsarih pakua) dah ngheh an nih theih nan hma lak mek a ni.
- c) Hma lak mek a ni a, a hun tur chiah sawi mai theih a ni lo.

SPEAKER : Zawhbelhna a awm rih lo maw? Aw, Pu T. Sangkunga.

Pu T. SANGKUNGA : Pu Speaker, ka lawm e. Heng teacher ho hi a nghet lova rei tak lo dah tawh 'Thlawhbawk Teacher' kan tih ang, rei tak lo thawk tawh, kum

upa pui pui an awm a. Department pawhin dahngheh tumin theihtawp a chhuah a, an la nghet hnem tawh khawp mai a. Ka bial-ah pawh khatiang harsatna tawh te kha an awm a, tuna Finance Minister hi Education Minister zahawm tak a nih lai te pawh khan mi a tih sak nual a. Amaherawhchu, Finance leh DP & AR Department hian an hming list kha 'hei hi a awm zawng zawng maw'? an han tih a, 'Aw' an tih hnu ah a dang kha a lo awm zel a, chuvanga harsatna tawh kan ni a. Ka bial-ah te pawh khian harsatna tawh an awm a ni, DP & AR hian an hriatthiam loh chuan an kum a over dawn tawh mai a. Zawhna tha tak niin ka hria a, DP & AR te pawhin an thian te tihngheh an phalsak hnem tawh a, amaherawhchu, tuna a la bangte query han siam zel mai bik a te hi a rual ta lo lu deuhvin ka hria a. Hei hi chu a bik taka DP & AR lam te pawhin an hriat sak theih turin kan Minister zahawm tak hian hma a lo la thei ang em tih kha ka'n zawt a ni.

SPEAKER : Pu T.T. Zothansanga'n han zawt law law se.

Pu T.T. ZOTHANSANGA : Pu Speaker, ka lawm e. Kan sikul tam takah hian IV Grade tunah hian kan nei lova, zirtirtu tlawmngaiten an tifaia an buaipui nasa em em tih kan hria a. Hetiang hi hnawhkhah tumna a awm em? Hnawh khah tumna mumal tak awm ta lo sela M.R. talin indah theih dan a awm em tih kha kan zawt a.

Tin, chutih rualin Matric leh +2 kan han exam hian IV Grade an awm loh avangin zirtirtu hmun hrang hrang atangin kan pawt khawm a, a nawl puia IV Grade kan indah thei lo a nih pawhin hetiang exam centre-ah tal hi chuan IV Grade hi kan indah thei ang em?

SPEAKER : Pu Ngurdingliana khan zawt nghal se.

Dr. NGURDINGLIANA : Pu Speaker, Minister khan min chhan theih tho ka ring a. Hei mamawhna avang zawkin ram pumah khaw hrang hrangah kumin academic session atang hian khawtlang leh MLA tang kawpin pawl 11 leh 12 din tumna khua tam takah a awm a. Kei pawh ka bialah khaw thum laiah kan din thar dawn a. Hei hi keimahni kut liau liauva ding tur kan ni a. Permission chungchangah harsatnate a awm thei ang em tih kan zawt e.

SPEAKER : Awle, Minister chhang turin sawm ila

Pu H. ROHLUNA, MINISTER : Pu Speaker, member zahawm tak Pu T. Sangkunga zawhbelhna amah pawhin a ngai pawimawh a, ka hnenah

office lamah te pawh a rawn sawi thin a. A bial lama khawngaihthlak tak tak te pawh a rawn sawi pui thin a, hei hi chak takin kan kalpui thei mai lova. Department-in kan tih mai theih loh hi a awm a, DP&AR leh Finance lamah te Recruitment Rule hi relaxation te dil a lo ngai a. A chhan chu an thawhnate a lo rei tawh a, an hun laia HSLC passed kha qualify an nih laiin tun hnuah kum 2015-a Recruitment Rules siam that a lo nih khan HSSLC (Pawl 12) pass a lo ngai ta a, chu chu an lo pass mai thei thin lova chuvang chuan harsatna kan tawka.

Tin, chu mai chu a ni lova kum 2015 Recruitment Rules-ah chuan trained an ni tur a ni a, chubakah TET (Mizoram Teacher Eligibility Test) an paltlang ngei ngei tur a ni tih te a lo ni a, regularize theih mai an ni lova. Chuvang chuan department lamin a theih ang angin hma kan han la a. DP&AR lamah R.R. relaxation kan han dil sak a, chutiang chuan DP&AR lam te pawhin a theih ang angin min ngaihtuah sak a. A tirah khan RR hi a qualification thlengin M.TET mai nilovin min relax emaw kan ti a, hma kan han la a, mahse a qualification taka kha relaxation hi tih a ni lo tih kan han hre leh a. Qualification relaxation dil a nih leh a. HSLC ina an thawh tan tirh laia an qualification R.R. in a prescribe ang nei kha min han phal sak leh ta a. Chung min han phal sak ang chuan kan han process a (Speaker : chhan zawh tir law law ang aw) Pu Speaker, ka lawm e. Khatih hun lai zela qualification awm anga han lak dawn khan tam tak chu qualify lo te pawh an la awm bawka. Tin, 45 zingah hian 11 in an qualify chuang lova. Tin, pali an lo retire hman tawh a, pakhat pheih chu a lo boral hman tawh bawka. Chutiang chu a nih avangin 29 qualify an awm a, tunah hian agenda paper te DP&AR lamah kan thehltut tawh a. MPSC kaltlang ngai a nih avangin a process hi a thui ve zek a. Chu chu MPSC recommendation kan hmuh hunah anni hi kan regularize theih kan beisei.

Tichuan, member zahawm tak Pu T.T. Zothansanga'n IV-Grade mamawh thu a rawn sawi kha a pawimawh khawp a. Tunah hian IV Grade hi a za tel pension hmun ruak te, boralta hmun ruakte kan nei a, kan la hnawhkhat thei rih lova. School tam tak an buai phah khawp mai a, HSLC leh HSSLC exam centre-ah pawh hian neih lohna kan ngah avangin nikum atang khan a hnai vaia

mi IV-Grade leh , LDC te pawh exam centre te kan hawh tir a, exam zawhah an post ngaiah an let leh a. Chutiang chuan kan kal nawk nawk a, M.R. hian kan la ngawt thei si lova, DP&AR leh Finance phalna a ngai a. Chuvang chuan, a process hi a thui a. Hei hi tun maiah chuan kan la hnawh khat thei lo a ni.

Tin, member zahawm tak Dr. Ngurdingliana zawhbelhna Higher Secondary School (Class 11 leh 12) zirna hawn thar turah dan kan nei a, a dan in a phal chinah chuan Provisional permission hi kan pe zel a ni. A tlangpuiin zirtirtu hi B.Ed trained an ni tur a ni a. Hei hi chu kum nga chungin zirtirtute hian B.Ed qualification hi an nei tur a ni a. Ram leh mahnia building nei emaw mi in (building) an luah pawhin ram tal, sikul sakna tur an nei tur a ni tih te leh condition chi hrang hrang a awm a. Chung chu an full fill-a an tling anih chuan permission hi kan pe deuh zel a ni.

SPEAKER : Awle, Question Hour a zo tawh a, tunah chuan business dangah kan kal dawn a, chumi hmian hei vawiinah member zahawm tak pahnih Pu J.H. Rothuama leh Pu S. Laldingliana te an awm lova, Pu J.H. Rothuama hi chu a tir atanga awm thei lo a ni a. Pu S. Laldingliana erawh hi chu Lungleiah thil tul tak kal lo thei lo anih avangin chawlh a rawn dil a, kan phal sak a ni tih he House hi ka hriattir ni se.

Tunah chuan Presentation of Reports-ah kan kal ang a, Pu R. Vanlalvena, Subject Committee-III in present tur a neihte present turin i sawm ang.

Pu R. VANLALVENA : Pu Speaker, Ninth Report relating to On Farm Water Management (OFWM)/ National Mission On Micro Irrigation (NMMI) leh Pradhan Mantri Krishi Schinchayee Yojana (PMKSY) under Horticulture Department leh Tenth Report relating to National Mission on Medicinal Plant (NMMP) under Horticulture Department chu he House zahawm takah hian ka present e. Ka lawm e.

SPEAKER : A copy kha sem ni se. Tunah chuan Election to Financial Committee-ah khan inthlanna kan nei tur a ni a. Hmanni khan Election to Financial Committee a ruat thu kan ngaithla tawh a. Committee on Public Undertakings ah khan thlanna nei turin Pu R.L.Pianmawian Pu Lalrinmawia Ralte

a rawn nominate a, hetah hian nomination file dang an awm loh avangin, kan dan 202-na (1) in a phal angin Pu Lalrinmawia Ralte MLA zahawm tak chu chuhtu awm lovin thlan tlin a ni tih ka puang e.

Tunah chuan Financial Business-ah kan kal thei tawh a, vawiin atangin budget discussion ah kan kal dawn a. Pu Zodintluanga leh Pu John Rotluangliana te demand kan la dawn a ni. Minister te pahnih demand hi kan la kawp mai ang a, hun kan hman rei loh nan. Pu Zodintluanga'n a Demand, Sports and Youth Services, PHE Department, UD & PA Department pawisa a vaia hman tur vbc 5,84,59,56.000 te hi House ah han submit sela i lo sawm ang.

Pu ZODINTLUANGA, MINISTER : Pu Speaker, ka lawm e. On the recommendation of the Governor of Mizoram and with your permission sir, I move the demand Nos.22,25,46, for ` 5,84,59,56,000 only for meeting expenses during 2017-2018 in respect of the following Departments.

Demand No.	Purpose	Amount	Demand For Grants Page No.
1	2	3	4
22	Sports & Youth Services Deptt.	21,56,84,000	243-258
25	PHE Department	1,97,41,29,000	312-324
46	UD & PA Department	3,65,61,43,000	552-570
	TOTAL	5,84,59,56,000	

Thank you sir.

SPEAKER : Awle, tunah hian Minister zahawm tak Pu John Rotluangliana a demand nos. 17,42,43 a pawisa hman tur te he House ah hian rawn submit turin amah i sawm leh ang.

Pu JOHN ROTLUANGLIANA, MINISTER : Pu Speaker, ka lawm e. Mr Speaker sir, on the recommendation of the Governor of Mizoram and with your

permission sir. I move the demand nos. 17,42 and 43 for rupees 3,14,41,30,000 only for meeting expenses during 2017-2018 in respect of the following departments:-

Demand No.	Purpose	Amount	Demand For Grants Page No.
1	2	3	4
17	Food, Civil Supplies & Consumer Affairs	2,55,28,70,000	180-190
42	Transport Department	43,80,41,000	496-505
43	Tourism Department	15,32,19,000	506-513
	TOTAL	3,14,41,30,000	

Thank you.

SPEAKER : Kan Minister ten an Department chan a demand hrang hranga pawisa hman tur te an rawn submit ta a, tunah chuan sawiho na kan tan thei ta a ni.

Tihdan pangngai kan nei a, pakhat in minute 10 chhungin sawi zawh tum ila kan tih kha kan la ring ang a, tunge sawi hmasa ber ang le?

Pu VANLALZAWMA : Pu Speaker, ka lawm e. I veilam amite atang hian rawtna a awm a, member tin ten minute 10 kha a tha mai a. Tichuan kan Minister ten an khaikhawm hun turte pawh hi a bituk theih lawm ni tih kha kan ngaihtuah deuh a. Entirnan Minister pakhatin minute 30 ah te emaw zo thei ta ang sela. Amarawhchu, House Leader tak hi tunah tak pheih chuan a chan hi Department 15 lai mai a ni a. Ani te hi chu darkar khat lai te pawh han la sela a awm em em a. Chu chu i veilam atang hian rawtna kan han siam a, i dinglama thute pawhin an duh ve tho kan ring a ni.

SPEAKER : Dan naranin Minister te thusawi hun tur chu kan la bituk sak ngai lova, engpawhnise minute 30 chhungin an sawi zo tur a ni tih kha restriction kha kan siam ngawt thei lo ang a. An sawi tui dan a zirin kan kal ang chu mawle. A then chuan minute 30 pawh an hmang lo mai thei a

Pu TT ZOTHANSANGA : Pu Speaker, chuti anih chuan reaction kha beisei vak bik lo sela chuti anih chuan. Minister te an thusawi atang khan reaction tur tam tak an nei leh dawn a, khami kha an beisei ngam dawn lo anih kha chuan fix mai ila.

Pu VANLALZAWMA : Pu Speaker, kha kha a dik tho mai, Tha deuhvin min react a, a then chu va kal leh hian Department lam hian engteh chiamah an lo ngai chuang lova. Chutihlai tak chuan a pawimawh zual te pheih hi chu ziak hian min hrilh nghe nghe se. I hre vek a, Parliament-ah pawh hetianga react vak vak hi a awm chuang lo va, mahse a pawimawh chin chu ziak hian min pe sela a that zawk mah dan te pawh a awm a ni. Tam takin mahni bial chungchang te kan han sawi a an lo ngaithla lem lova, chutah ziak meuhva Minister ten min chhanna te kan lek theih pheih hi chuan a tha leh zual a. An chhang vek hman lo a nih pawhin ziate pawhin a tih theih tho tih te kha kan belh duh a ni.

SPEAKER : Engpawhnise, a hun bituk kha chair kutah i dah ang aw, an sawi dan atang khan a sawi tawi dan te chu a awm mai ang, Speaker kutah i dah thiam ang u.

Pu VANLALZAWMA : Pu Speaker, sawi hmasak ber kan chuh ang a, party thil pawimawha chhuah ka ngaih avangin. Naktukah pawh he tiang bawh hian a laklawh laia chhuah ka tum a ni tih kan sawi lawk duh a min hriat thiam thin ang tho khan.

Vawiinah kan Minister pahnih demand pawimawh tak tak sawi a ngai a, a lawmawm khawp mai a tamtak ka sawi lo ang a.

Tourism-ah hian Tourist Lodge te kan out source a, chutih mek lai chuan a deparment in a run mek te pawh kan la nei a, tlemin a rei tawh deuhva ka zawhna hi Tourism Department a kan sorkar Department in kan manage ho ah hian ka zawt mai mai thin a, Champhai-ah te, khing Chaltlang-ah te, Lunglei-ah te pawh hian MIFCO theitui te hi in nei em ka ti a an nei mang reng reng lo mai a. Ka ngaihtuah danah chuan kan Tourist Lodge-ah te leh Mizoram House-ah te hi chuan heng kan product ve te hi chu an kawl turah ka lo ngai a. Kan mikhual hnam dang te pawh, 'hei chutiang khatieng chuan Mizo thilsiam a awm a nia, in duh chuan,' tiin an lo offer ve fo

turah ka lo ngai a. Mahse khatiang khan an ngaihtuah lemlo, kan ngaihtuah lemlo em ni aw ka ti a. Mirama zin chuan tlema kilkhawrah te phei chuan anmahni thil siamte kan han duh deuh a.

Tin, an thil siamte kan ei chak a, Mizo bai te hi chu an ti tha viauin ka hria a, khatiang thil dang a kha tih tel hi a va tha em! Hnam dang lo zin tan chuan kha kha a hlu ve riau a. An lo offer a tam tak chuan a tul pawh an ti lo mai thei a, mahse tam tak chuan an duh ang a (Speaker : kan in thlak rih lawk dawn khawngaihin aw) (Deputy Speaker : Le chhunzawm rawh le) Pu Deputy Speaker, kan sawi zawm ang a, khatiang khan kha kha tih theih ni ta sela. Hman deuhah Nagaland-ah kan zin a, Naga chaw te kha kan ei chak viau lai khan India ram hmun danga chaw kan ei thin tho kha min hlui a. 'In chaw ang hi a sin mawle kan ei chak le,' kan ti a, chu chu anmahni sorkar Guest House ah tho khan a ni a. Vai rama 3 star 5 star vela kan ei ang tho kha min ei tir a. Keini lo ngaihtuah dan chuan Nagaland-a zin chuan an chaw te leh thil dang han ei te pawh kan chak a. chutiang chuan Mizorama lo zin te pawh hi an nih tho ka ring a, chumi chu ngaihtuahnaah hman a va tha em!

Tin, keimahni thil siam ngei tih lar nan te pawh a tha a, tam tak te phei chuan tui an tih viau phei chuan an khaw lamah te pawh an hawn ang a, Kolkota lamah, Delhi lamah te pawh an hawn ang a, an chhungten an lo duh pui viau chuan a chahte pawh an la chah ang a, kha kha a sem darh dan tha deuh mai a niin ka hria a. Hei hi tunah hian kan ti ta em ka hre lova, ka zawhna a rei deuh tawh a ka tih kha, hman deuh khan ka zawt a kan kal tumin kan ti lo a nih hlah chuan tih atan a tha hlein ka hria a.

A dawt lehah chuan Transport chungchangah nimin khan ka sawi zawk tawh a. Kan DTO Office hi a bik takin Aizawl hi then a ngai a ni tih te. Chutih lai taka kan sawi leh duh hei Motor Vehicle Act te pawh All India atan te an ti a. All India tan Supreme Court in ruling te pawh hi a lo nei a. Kha hmanni pillion rider a mi phurh zawk tana helmet chungchang ka zawh a kan Minister zahawm takin a comment kha a tha hi ka ti ang reng tlat mai a, wawiin a sawi nawn leh hi ka duh a.

Tin, hman deuha sun control bel pawhthlak tih chungchangah te pawh khan kan hre tawh a, Supreme Court ruling a awm alawm tiin dim baksak lo hian a enforce tu nia inngai te khan min pawhthlak sak nawk nawk mai a. Pu Deputy Speaker, ka hre soal a nih loh chuan Law Commission Chairman i nih lai pawh khan Lunglei

lamah tiang kha i va tawng nghe nghe niin ka hria a, a zialo hi ka ti a. Supreme Court Ruling tih chhuanlama khatia tih vak mai hi thil tam tak hi chu zawma tih ngei tur awmin ka ring a. A then erawh hi chu dul deuh hleka kalpui a pawl lemlo hi a awmin ka hria a. Dik tak chuan sun control bel tihte pawh Supreme Court ruling a nihna background han en chuan khung Delhi vela glass bel dum vek a rape leh thil tih a tam tih atana an rel hi niin a lang a. Mizoramah hian khatiang case pakhat pawh hi kan la hre lo a ni lawm ni tih lai khan khawng em em a lekkawh an tum lai te kha a fello in ka hria a. Chu chu hmanna Two Wheeler-a chuang a hnung ami in helmet khum kher i chhan dana kha a tha ka ti a, kan tih thiam hi a tulin ka hria a. Han sawi kai ta lawk ila, Teak chungchangah te pawh hian hmun danga kan hralh chhuak thei lo a nih pawhin tlemin beng hi chhu ngawng deuh ila kan mit hi len zau lo deuh ila, Forest lam te pawh hian kan ram chungah hi chuan zalen deuhin vir vel thei sela. Kan chin ania, kan lo in hngang fak ve na ber a ni a, pawimawh hian ka hria a, a hminga MP ka nih ve lai khan tum 2 chu Champhai ah khian custom duty te kha ka ko ve ringawt a, an lo kal a. Ka sawipui chu hei Silai leh Drugs leh engemaw thil hlauhawmah hi chuan strict hle ula a pawl lo. Amaherawhchu Hairep tih ang vel, Slipper, Nihawichi tih vel, Sahbawn tih ang velah hi chuan strict vak teh suh u. Hei hian Indian economic a khawih tak tak lo. Chutih lain Delhi tlanga cheng 100 a kan lei theih Champhaia cheng 150 a kan lei thil hi a tam lutuk kan kilkhawr avangin. Chuvang chuan heng thil ho mai mai Mizo mipuiin kan mamawh puanthan tlawm tih ang chi te tiangte kha chu lo strict vak lo ula. Chu chuan keini rural area ami te kan economic hi a khawih danglam pha tlat ania te kan ti ve vak a. Han strict lo deuh mahse an kilkhawr deuh bawka an lo strict leh a. Kan sawi kual nachhan chu dan chu a ni chiah lo mai thei a, mahse keimahni kan hamthatna tur ang zawnga thil hi kan herkual hret hret thiam hi chuan keimahni tan bawka hian a tangkai tih kha kan sawi kual pahna ni sela. Chulai chu Transport ah chuan ka duh tawka mai a thildang ka sawi lo ang a.

Minister zahawm tak Pu Zodintluanga Demand-ah khan thil han sawi kan duh lai pakhat chu ka sawi tawhin ka hria tum khat pawh. Sport & Youth Services leh hemi kan Sport Council-te hi hei tunah chuan thalaiho te pawh an harh chho a, sport lamah hian hma kan sawn tha em em kan ti toh a. Chutih mek lai chuan an tum mek pawh a ni tho chuan ka hria a, building kan neilo hi a zahthlakin ka hria a, Council an ni

emaw, Sport Director an ni emaw building kan nei lova, mi ina kan awm ringawt mai lai reng hi chu chak deuh zawka hmalak hi a theih lawm maw ni le aw kan ti a,

Mikhual tha tak tak te pawh kan lo thleng ve tawh thin a, inkhel mi hmun dang atang ten an lo kal a, kan office-ah te kan hruai lo thei lova, chungho hmuh atan chuan mahni building pawh nei lo, department tam takin an nei a, a tha a an lawmpui awm a, Sport and Youth Services lamah hian building sak hi ngaih pawimawh a chak leh zuala nawr hi ni ta se tih kha ka thahnemngaihna lam a ni a, thui tak ka sawi lo ang a.

A pahnih naah chuan PHE lam hi hei tun hnai te hian kan hria a, saw kan bial lamah te khi Tuikhuahtlang lamah te, pawh pipe phum hian kan hman hlel a, a tha khawp a, kan vai ta tur tui pipe an phum a, kawng an lai chhe nasa khawp mai a, nimirah pawh kan ngaihthlak tawh ang khan a siam leh lam hi hei aia hmanhmawh deuha tih theih dan hi a awm lawm maw ni aw tih hi vawinah kan sawi lang duh a.

Tin, PHE-ah hian ka sawi duh pakhat chu hman deuh hlek khan tui connection ka buaipui ve a. Connection ti tur khan in hmun pass original ngei hi ken a ngai a ni. Tunlaih kan hria a, building chhawngte a lo awm ve tawh a, electric ho in an tih ang hian a neitu hming tur khan tih mai theih ni ta se LSC neitu hming kher khera tih a la ngai reng mai leh te chuta ka question chu a Xerox copy poh an pawm lo a ni. Chu chu khawimaw dan in nei em ni ka ti a, an banga an tarte ka va en sak a. CE in a order kha a original ngei an duh a chu chu anmahni Photostat in a thla kan la duh a ni an ti a. Kha kha an strict em em mai a. Lehlam zawnga ngaihtuahin pakhat a lo kal a khilaia kan original document kan In hmun pass kha a nih ang chiah maia thla an lo lak hian engemaw zawngin a kawithei em aw tih ka ngaihtuah a. Tuin emaw lo print chhuak sela, tunlai thlalakna hi a tha tawh si a, a original leh duplicate pawh hriat hran loh hian a lak theih a ni, kan hotuten in hre vek a. Tah khan a ni lo zawngin kha kha lo putru se, tuten emaw lo va zuar se a buai theih ang em aw tih thlengin ka ngaihtuah a ni; Photocopy kan attest te hi chu thudang daih a ni. PHE office-a a nih ang anga thlalak an lo kawl ve theih lai te hi a tul ber em aw! Tuten emaw lo ru chhuakin lo print chhuak se, a original leh a duplicate pawh hriat theih loh khan tunlai kan khawl hi a tha tawh si a, chungte pawh chu ngaihtuah thlen a va ngai em aw tih hi ka ngaihtuahnaah a awm. Tin floor hrang hrangin connection hrang kan neih theihna tur ang chi hi ngaihtuah a tha. Hei tunah pawh MLA te facilities min pe a, Assembly lam atangin kan tui bill te pawh kha

re-imburse theih ni a. Keini ve ngawt pawh khi ka hming taka connection awm khi a awm thei reng reng lo mai a. LSC kha ka pa hming a nih avang khan, khangte pawh kha khami thleng khan kan ngaihtuah a va ngai tawh em! Midangte pawh an nih ve tho ka ring a, kan tui hman taka khi ka hming a bill khian a kal hlei theilo a ni. Chungte pawh chu thil har a ni loin ka hria Power & Electricity Department tih ang hian tih ve theih a ni em tih kha ka'n sawi duh a

Thil pakhat UD&PA-ah hian sawi tur tam tak a awm thei ang a, mahse thil tam tak ka sawi lovang a. Kan sawi duh zawk pakhat chu mahni bial chhung lamah han kal ta ila. Mission Vengthlang YMA te sawn an hmun neihah sawn TT Training Centre cum Basketball Court tihna tur hian project an siam a. Chutah chua NECS ho kha an va ngen a, an va tahawh a, annin an siam sak a. Tichuan sorkarin Central ah a thawn thla a, sanction an hmu ta a nikum hmasa khan, nuai 350 lai kha an rawn sanction a. Amaherawhchu an sanction atanga tun thleng hian, October Ni 30, 2015 niin ka hria sanction lo kal kha, tun thleng hian hna a la tan theih lo va.

An hotute nen kan han sawiho a, tuna kan thawh tir tum dan pawh hi an lo ngaihtuah danah chuan NECS in an tih kha chuan an thawk mai turah an ngai a. Mahse sorkar lam hian restricted tender in an chhuah a. Chutichung chuan tun thlengin tih fel a la ni lo va. 1st installment an release na pawh hi a rei tawh a nuai 133.5 tih vel kha. Chu chu kan YMA lam te pawh sawn an ngaihven khawp mai a. Chutihlaimek a an sawi pakhat chu NECS kha an tih tir a, an thawh dawn loh pheikha chuan khami an project siam man te kha min rawn thing se tihngaihna der hi kan nei lo a ni an ti a, a dik khawp hian ka hria a. Chungte pawh chu ngaihtuahnaah kan Minister zahawm tak hian hmang thei se.

Tin, tuna hna an la tan lo lai tak saw ania an buanai pakhat a chu. 1st instalment an sanction na a rei tawh si a, tunah engmah an la ti lo va. An sawi zel dan chuan Pu Thana bialah hetiang deuh hi a awm niawm takin an sawi a Ramthar North-ah khan, hemi case inang deuh hi. Chute pawh chu kan Minister zahawm tak khan engtia tih tur nge, a veng neitute chuan a hna hi a thawh kan duh pawh a ni lo va. Tupawh in thawk se keini tan a pawl lo. Amaherawhchu, a tir te a kan va tahawh avanga min tih saktu an dawng ringawt mai te pawh hi, tih te pawh an sawi a. Khati zawng khan ngaihtuahna kan

hmang lo a ni mai thei a sorkar atangin, hei hi a pawimawh khawpin ka hria a. Tin, tan vat se, nei vat ila tih kha anni thupui kha chu a ni a.

Tin, a tira anmahni lo buaipuitu NECS pawh kha an hmaizah khawp mai a, annin an thawk dawn lo a nih pheih kha chuan contractor tunge lo thawk dawn tih pawh kan hre lo va, tih kha an sawi a. Chungte pawh chu kan Minister zahawm takin min hriatsak se tih kha kan sawi duh a. Sawi tur tam tak a awm thei ang Pu Dy.Speaker, khang kha ka duh tawh ang e, ka lawm e.

DEPUTY SPEAKER : Group leader a nih avangin kan han pe thui deuh hlek a, minute 15 dawn huna hmang a ni. Tunge sawi veleh ang le, a tawp lamah khan kan in chuh leh vak si ang e. Sawi tur kan awm lo em ni ? Dr.Ngurdingliana.

Dr. NGURDINGLIANA : Pu Dy.Speaker, ka lawm e. Keipawh group leader ang deuh khan chawhnu programme ka neih avangin chawhma kan chuh a. Vawiina kan Minister zahawm tak tak pahnih demand sawi tur hi chai vak pawh ngai lo niin ka hria a. Ram tinah, ram pum huapin an dapchhuak hneh em em a. An department chan hi enkawl hneh sawh tak an niin ka hria, a lawmawm.

A hmasa in Pu Zodintluanga demand-ah kan lut ang a. PHE hmalakna hi an fakawm ka ti a. A ram pum mai a, a district huapin Water Supply Scheme an neih te mit ngeiin ka hmu a. Tin, nizan lamah pawh kan collect a, ka collect zat chu vawiinah 15 a ni a. Mahse ka hriat bak leh source dang atanga ka neih nen pheih chuan a vaiin 54, zawh tawh tam tak; tin, thawh mek te an han nei bawh a. Chuvang chuan PHE Department hian an hming an pu zo hle in ka hria a, an phe chak a ni. Chuvangin kan Minister leh a thawhpuite zawng zawng Zoram mipuiin tui thianghlim leh tui hnianghnar tak kan in theihna turin hma an lak naah hian lawmawm ka ti a. Chu chu House-ah, a tawi zawngin kan sawi a ni e. A list pawh hi Pu Dy.Speaker, ka nei a. Amaherawhchu, kan hriat vek, mit ngeia kan hmuh sak bawh a nih avangin vawiinah Appreciation he House-ah han pek ka duh a ni PHE bikah.

A pahnihnaah chuan Sports chungchangah Pu Dy.Speaker i hria a, keipawh a mimalah inkhel mi ka ni. A ram pum huap, national level te pawhin. Kan Minister leh a Department te hmalakna hi mit ngeiin vawiinah kan hmu a, a tam a. Kan vanglai hun khan lo Minister se chu kan thleng sang ve tho ang keini kan hunlai ami te pawh kha. Tunah chuan kan Chief Minister in thalai te a fuih ang chiah hi vawiinah pawh sawi

chhuah ka duh a. Sports-ah chuan, engkim kan thalai te Indoor Games a ni emaw, Combat Sports a ni emaw, Football, Volleyball, Basket Ball hmunhma a tha thei ang ber world standard kan hlui a ni. Kan thalai ten an tih tur chu anmahniah a in nghat. Tumruhna te, tuarchhelna te, taihmakna te kan neih a ngai a. Chumi piah lamah an mental growth, an rilru, an taksa piah lamah tunlaih khawvel inelna a sang tawh. An mental growth tur pawhin zirtirna tha tak an han dawng zui te hi vawiinah kan Minister hmalakna leh kan Chief Minister in a tui falpui em avanga vawiina Zoram thalaite international level-a lawmman vawikhat mai ni lo, vawi hnih vawithum bakah exposure kan han nei te hi a lawmawm ka ti a. A infrastructure pheih chuan a tam lutuk sawi tur, mahse hemi kan hmalakna zawng zawngah hian kan sawi duh chu tunah hian Lunglei tlangdung hi chu infrastructure-ah kan Sports Minister leh a thawhpuite hian hma in lak thatpui viauin ka hria a. Kolasib tlangdung pawh, tunah Darlawn tlangdung, member zahawm tak Pu Piana bial Sports Complex te pawh in han din dawn a.

Tin, tun lawk khan kan zawt a khawthlang lam khu tlemin kan theihngilh deuh em ni chu aw ka ti a. Amaherawhchu, theihngilh bik lovin tunah hian Sport Infrastructure Development Hachhek area atan vaibelchhe 4 in hma lak mek a ni tih te kan lo hre leh zui zel a, a lawmawm ka ti khawp mai. Chuvang chuan, hemi kan Sport Department, a Minister te nena an hma laknaah hian he House-ah pawh hian lawmthu sawi bak sawi tur vak ka hre lo va. Kan ngen ve duh mai mai chu hei kan Home Minister te hmalakna in keini bial demand area, inremna kan nei thei thuai dawnin a lang a. Kan thalaite talent nei tha tak tak an tam a. Kan Minister hian kan bialah pawh Sports Council kaltlangin hma min rawn lak sak nual tawh a. Tuna kan bak chu hetia remna kan han neih ve dawn takahchuan Sports Complex, tuna kan han buaipui mek hi min rawn ngaih pawimawh sak thei se tih hi ka ngen duh a. Tlangval lianpui pui, nula lianpui pui te pawh kan nei tam a. Anni pawh hmasawn chak em em remna hnuaiah chuan tunah hian riltam takin an awm a ni tih kha min rawn hriatsak se ka duh a ni.

Minister zahawm tak Pu John Rotluangliana Demand-ah kan lut leh ang a. UD&PA chu nakinah member zahawm tak tak dangin rawn cover turin kan ti zawk a, kan tel lo mai ang a. Kan hria a nikum lamah leh nikum hmasa te. Mega block vang te, tin, food security avang te, tin, Food Security Act te hman a lo nih avang ten khawilaih emaw khan khaihlak an awm deuh a. Kan Minister zahawm tak pawh

media atang ten khawi khawi emaw atang ten an han chuk luai luai a. Amaherawhchu Pu Deputy Speaker, he House ngeia ka sawi kha kan la hriain ka ring a. Heng te hi chu hun inthlak danglam thil a ni a, hmanhmawh thil a nih avangin mega block hunlaia Mizoram mipuite riltama awm lova hnianghnar taka min chawmtu Minister kha a la ni tho a i lo nghak ang tiin he House ah pawh ka din chhuah pui kha. Chutiang chuan gas ah harsatna kan nei lova, buhfaiah harsatna kan nei lova, kudam ruak thla kan lak te hi chu a quota system kan hriatthiam loh vang mai a ni a. Kan Minister in a wind-up hunah a rawn hrihfaiah turah ka ngai a. Hmanhmawh takin khawi thalai lai in emaw thla an lo la a social media a an han post te hi chu a dan kalphung an hriat loh mai vang a ni. Chuvangin kan Minister leh Food & Civil Supplies te thawhrimna, hmalakna avangin vawiin ah tumah phunnawi awm lovin, noise pollution ti tam tu zawk an niin ka hre hial zawk a an demawm letling zawk a ni. Gas a lak theih, buhfai a lak theih tih hi tuktin mai te hian an au luh luh mai te pawh hi ninawm lamah pawh a kal lek lek zawk tawh a ni, chu chu Food & Civil Supplies -ah ni se.

Transport department-ah hian kan Minister leh Transport official ten Pu Deputy Speaker, remhre takin thil thar an rawn introduce a. Two wheeler taxi tih te, tin, Aizawl khawchhung rawn lut lo Durtlang Leitan, Thuampui, Melthum, Chhangurkawn-a auto-rickshaw hmanghang hre tak maia an han siam te. Tin, tourist bus kan han tih ang te SUV permit an han pe chhuak te hi hmasawwna tha tak, remhre tak, hmanghang hre tak Minister leh official te kan neih vang niin ka hria a, a lawmawm a. Tin, tunhnaiah an office tur te pawh sak zawh tawh an ni a hengte, pawh an lawmpui awm em em a. An kutah hian mawphurhna lian tak a awm a ni tih an hriat vang te pawh hian an hmalakna, an thahnemngaihna ah lawmthu ka'n sawi duh a ni.

Chuvangin heng kan Minister Demand te hi member ten kan la sawi dawn chauh a, an hmalaknaah hi chuan an fakawm thlawt ka ti a, tha an seng a, rilru an seng tih a hriat a. A rampum maiin kiltin hmun tinah hmasawwna kan han hmu te hi a lawmawm a, chuvangin an Demand hi lawmpui pahin he House-a pass ngei turin ka'n thlawp thu ka rawn dinpui a ni e, ka lawm e.

DEPUTY SPEAKER : Le, tunge han sawi leh ang? Hun a hmang dik khawp mai. Pu K. Sangthuama.

Pu K. SANGTHUAMA : Pu Deputy Speaker, vawiin hi ka nuam zan lova, chuvangin sawi hma hi ka'n chuh ve deuh ang a. Deputy Speaker pawh khan min lo hriatpui se, chawhnu lam chu ka attend theiin ka ring lo deuh hlek a.

Vawiinah hian Demand No. 22-na Sports & Youth Services tih kha tlem han sawi ta ila. Sports lamah hian hma kan sawnna pawh a lawmawm hle in ka'n hria a, kan Sports Minister hnenah pawh lawmthu ka'n sawi nghal ni se. Amaherawhchu thingtlangah leh hmun tam takah hian in la tih awm a ka'n ngaih ve chu Sport lamah hian heti laiah ground tha tak tak te kan nei a, heng kan neih a rawn in phochhuak pha ve lem lo khaw tam tak hi kan awm a. Chutah chuan field han siam sak a bul han tanna tur hi kan la tlachham deuh hlekin ka'n hria a. Khi kan khua Sihfa ah khian tunhma atangin football kan pet ve lai atangin field chhe deuh mai kan nei a. Tunah khian ka zawt a Sihfa ah khian an MLA hian field min laih sak e cheng nuai 10 vel in an ti a, cheng nuai 10 te chuan a zo lo maithei a. Chutiang ang chuan bul an rawn intanna tur hi kan Minister zahawm tak hian ram pumpui hi vawikhatah chuan a tih vak theih loh ang tih chu a hriatsa a, khatiangah khan hma han la tan chho se a tha awm mang e aw tih kha vawiin ah hian han sawi ka duh a ni.

Tin, Aizawl-ah hian tlak lampang khu tlemin min ngaihsak deuh hlek ula chu kan duh khawp mai a. Sport chungchangah te pawh hian field hi kan nei tha lo em em mai a, a tih theih na lai tur eng eng emaw pawh a awm ve a, chumi kawngah chuan ngaihtuahna min han hman sak sela kan duh khawp mai Aizawl tlak lam hrim hrim hi. Ka bialah te pawh khuan tunah Sairang Dinthar-ah khuan sport complex nge ni din tan a ni a, khutiang deuh khuan a field hrim hrim hi an lo in zir chhohna atan khan cheithat theihna awm sela chu hma kan sawn chhoh zelna tur niin ka'n hria a, kha kha sport lamah chuan tawh mai selangin.

PHE-ah hian Sairang-ah khuan han ti ta ila, mahni bial a nih avanga han sawi ka ni tho chungin, PHE hian tunah khuan tui cluster, hetiang a tui khawlaia an han lakna tur hi an laksak vek tawh mai a. Tin, connection khu

a har em em mai a, connection neilo an tam a, tunah khuan a tam zawk khuan kan nghei a ni mai e an ti a. Hmanni ka zu kal a, chu chu kan Minister zahawm tak hian min hriat sak sela a tih dan kawng min lo dap sak se kan duh khawp mai a. Tui lak hi a khirh ang reng khawp mai a, hetiang a khawlaia PHE atanga kan han hmuh an han dawh den den te hi a lo tha khawp mai a. Chutiang ni lova a vaia house connection han ti tur chuan entiran pipe pakhat pawh sangkhat dawn dawn a lo ni a, a sing tel a ngai vek mai a. Chuvang chuan chulaiah chuan harsatna an nei a, helai hi la ngaihtuah chhonzawm theih a ni ang em tih kha min lo hriatsak se ka'n duh khawp mai a.

Tin, pakhat leh ah chuan PHE-in an tui pump Seventh Day tlang ami khu tuizem lian tak mai an dah a. Khutah khuan a pump chhohna pipe a zim lutuk, engnge ni a te lutuk a, darkar ah 36 hours deuh tho a ngai a, khu khu a rang lama a lian a thlak theih chu ni se khulaiah khuan tui harsatna a awm lo in a rinawm a. Tunah erawh chuan harsatna khulai pumpui deuh thaw khuan an nei a, hei hi min lo hriatsak bawk se a that ka'n ring a. Chuvangin a pumpuiin ka bialah khuan khaw 15 a awm a, khaw 15 ah khuan tui chuti lutuka awlsamna a la thleng lova. Chuvangin a bik tak pawhin ka'n ngen duh a kan Minister zahawm tak hi, tlemin Aizawl atangin ti mai ila a zuk tlaklam deuh a, a harsa deuh a chu chu kan hrethiam tho a. Chutih rual rual chuan khaw 15 khu chuti lutuk in tui kan la hnianghnar lo a ni tih kha min lo hriatpui se tih kha ka'n duh a. Hma tun aia chak zawka min laksak thei turin ka'n ngen duh bawk a ni.

Tin, Demand No. 46-na ah khan UD&PA-ah SIPMIU lamah hian pawisa a tam viau a. Hemi PHE ai hian a let deuh thawin kumin ah dah a ni a. Chuti chungin kawng tihchhiat (a mawi lo lam zawng ni lo in) kawng tihchhiat hi chu an sam khawp a, a siamthat leh lam hi chu an sam lo ang reng khawp mai a. Hmanni khan ka zuk kal a, Zotlang atanga Chawnpui-a kalphei khu an black top mek a, khumi an black top pawh khu seal-coated awm lo in an lo ti a, kan han sawipui a, hei chu seal coat turin ti ta ula, chutulo chuan fur te an han ni ang a, fur khat bak a daih lovang a, chuvangin khawngaih takin a enkawltu te kha lo kal ula i sawi ho teh ang u kan ti a. 'Khawngaih takin hei hi chu min tih sak leh ula, min tih sak loh chuan nikum lama kan siam pawh hei

fur khat a daih tawk tawk a ni mai a,' kan ti a, 'ngaihtuah kan lo tum ang e,' an ti a. Chuvangin SIPMIU ho an black top ah khuan kan Minister-in min lo enpui sela, a tul dan ang angin hma min lo lakpui sela kan duh a. A chhan chu kumin a siam kha kum 2/3 a that theih chuan kum kha a a chhiat mai ai chuan tlema a senso kha a lo tam hret pawhin SIPMIU lamah hian pawisa a tam viauin ka hria a. Chuvang chuan chuti lai chu min lo hriat sak turin ka duh bawk a ni. Awle, kha kha PHE leh Sport leh UD & PA ah chuan duh tawk mai ila a tha in kan ring a.

Tin, Demand 17-ah Food & Civil Supplies Consumer Affairs ah khan, Phunchawng-ah khuan retailer in hman deuh khan retailer pakhat zelah buhfai kg 2 a lo cut vek mai a, an lungawi lo khawp mai a, hei hi kan Minister zahawm tak khan min lo hriatsak se kan duh a, enge ni a cut chhan tih chu kan hre lo a, kan chawi nasa em a, kg 2 hi ration card tin ah kan cut mai a ni ti a tia. Chu chu a min hrih dan a nia, amah ngei ka zawt lo a, chu chu kan Minister hian min lo hriat sak se kan duh a. (Dy. Speaker: Retailer tin ah a cut tih kha, ration card tinah) retailer ni lo in ration card pakhat zelah kha kha ka sawi sual a ni min lo ngaidam ula. Thil pakhat leh ah chuan K-oil, Phunchawng-ah bawk khan retailer khan card zawng zawng rawn submit vek ula a ti a, an submit vek a. Tichuan, Rangvamual-ah khuan retailer a awm a, retailer hnenah khan mi pahnih in an lo han la fai vek mai a, chu chu lak an han tum ve khan hei an lo la vek tawh alawm an ti a, an card ah khan an lo enpui leh vek si a. Anni chuan retailer in rawn dah rawh u a tih chuan dah mai a kha enge ni a chhan pawh an zawt chuang lo a, thuawih takin an dah mai a ni a, hei pawh hi khawngaih takin min lo enchian sak sela, a lawmawm hle in kan ring a. Tin, buhfai chungchang tunah hi chuan mumal takin kan nei ni awm tak a ni a, helai hi chu thui tak sawi lo ta mai ila.

Demand 44-na Transport chungchangah khan hei transport hi hmanah khan ka la ve tawh a, rin aiin motor a pung chak ta a, Aizawl District ah rigawt pawh motor a nuaih tel lirthei hi a awm ta a ni a. Chuvangin, anmahni pawh khi an hah hle in ka hria a, an thawk rim viau. Nimim lamah khan Pu Vanlalzawma kan MLA zahawm tak khan a rawn sawi tawh ang khan ngaihtuah deuh chu an ngai viau mai a, lirthei hi enkawl tham Aizawl District-ah pawh hian a awm a, chuvang chuan transport hi a pumpuiin Aizawl ah mai ni lo Mizoram pumpuiah hian ngaihsak leh zual a tha in kan hria a. hei Minister

fel tak kan nei a, anni pawh hian a hmalakna ah hian a la tha thawkhat in a lang a, chuvangin theihtawp chhuah zel turin vawiin ah pawh hian kan ngen duh a. Hei license ringawt te pawh hi duh kan lo tam ta si a, a sing a sing, a nuai a nuai tel license neih a lo ngai ta a, hetiang kawngah pawh hian mihring in daih deuh hleka, thawktu indaih deuh hlek a ruahmanna siam theih a nih chuan tih kha kan sawi duh pakhat chu a ni a.

Tin, Tourism 43-na ah khan hei privatization kan ti a, Tourist Lodge ah hian hei hi enge ni a result aw a tha em tih te, a thenah hian a tlawm leh lutuk a, kum khata cheng sang tel lek emaw, thlakhat a cheng sang tel lek emaw lakna te a awm a, a tlawm lutuk a. A thenah chuan an chhang to lutuk a hlawkna an nei dawn em ni tih hial te ka nei a. Khutilaiah khuan pakhat chuan thlatin cheng singruk in ka chhang a ti a. I hlawk dawn em ni ka ti a, ka hlawkin ka ring a ti a, a nih te chuan a lawmawm hle a. Amaherawhchu, Pu Dy. Speaker, chutih rual rual erawh chuan hmun thenkhatah erawh chuan a tlawm leh lutuk a, a uihawm ka ti a, hei hi a theih dan kawng kawngin kan Minister hian lo ngaihtuah chhunzawmin lo en tha leh zual se a tha awm mang e aw ka ti a. Tourist te an lo kal a, thianghlim deuh hleka an tih theih a pawimawh a, duh aiin a tawp deuh hlek avangin a vai hian, a tawp deuh hlek chuan keini ang rual pawh kan lut a kan tim a ni a. Chuvangin, thianghlimna ah hian kan rilru kan dah a kan in zirtir a ngai hle in ka hria a, chuvangin Tourism Department hi hlawhthling viauah chuan a sawi theih loh mai awm mang e aw ka ti a. Minister thawm na ve tak chak tak a awm a, hetiang lamah pawh hian a ngaihtuahna hi Pu Dy. Speaker, rawn hmang leh zual sela tun ai hian a tih that theihin ka ring tlat a. Taihmak pawh a taima in ka hria a, khaw thlangah a vak thla ngun bawka, chuvangin a pumpui hian han ennawn leh deuh se, tun aia khual zin lokal te, ram dang atanga khual zin lo kal mai ni lo Mizoram chhung atang pawha hetia Tourist Lodge-a thlenna tlak ah hian buatsaih sela tunai chuan hma kan sawn ang tih kan ring a. (Dy. Speaker: I hun i hmang zo tawh a nia, tawp dawn tawh la) Awle, enkawl na hi tha deuh hlek sela tichuan hma kan sawn in kan ring a. Chung chu vawiinah kan Minister pahnih te demand ka sawi theih tawka ni mai sela, ka lawm e.

DEPUTY SPEAKER : Pu T.T. Zothansanga

Pu T.T. ZOTHANSANGA : Pu Dy. Speaker, ka lawm e. Opposition Group Leader sawi hnua sawi hi an ti lo thin tlangpui a, vawiin chu dan kan bawhchhe teuh mai dawn a ni a, kawng leh lamah chuan amah in party meeting a ngaih pawimawh vang kha a ni a.

Assembly hi kum khatah vawi hnih khat bak kan nei si lo a, party meeting hi hun dangah han nei thei hram se aw ka ti deuh a ni. Helai Assembly hun bawhpelh a han chhuah hma a, midang zawng zawng dan min han bawhchhiat tir hi chu a fel chiah lo a ni, kan convention a bawhchhe ve deuh a ni.

Pu Deputy Speaker, demand kan sawi duh chu, tui PHE chungchangah hian sawi duh ka nei a, kan sorkar hi Pu Piana'n 'hawng sorkar' a ni a ti a, kei chuan 'tui pe sorkar' a ni ka'n ti ve leh deuh kher teh ang. Tukin Vanglaini chanchinbu-ah khan a last page ah khan in lo en chuan a xerox chu ka rawn keng tho a, kan sorkar ni lo sorkar hmasa nena tui hmalakna rawn khaikhinna kha mumal takin a rawn tarlang a, chutah chuan sorkar hmasa chhung zawnga NLCPR atanga an pawh chhuah bak kha chu pakhatmah an pawt chhuak lo a. A tawi zawngin kan sawi mai ang a sorkar hmasa kha chuan vaibelchhe 9413.81 laia tui a buaipulai in keini sorkar ah chuan vaibelchhe 25,549 zet maiin tui hi kan buaipui a, chu mah mah kan term a la zo lo lehngal, cheng nuai 16134.89 in kan sorkar in hma kan lakna hi a tam daih zawk a ni tih ka'n sawi duh a.

Heta ka rilrua lo awm chu term hmasa 1998 inthlan dawn khan kan member zahawm tak Pu Sangzuala (L) khan a sawi ka hre reng a 'Central- ah thil kan vawm thla nasa si a, engkim mai hi a rawn chhuak tur hi a tam nasa lutuk a, inthlana kan tlak teh chuan a pawl ang chu aw' a ti a. Tichuan,1998-ah chuan kan han tla ta ngei a, party dang an rawn sorkar a, chutah an CM chuan "E khai! tun tum chu keini chu kan vannei e, malsawm period ah kan lut chat mai, nem muka liam zawih zawih pawisa a awm a ni," a ti a. Tuma thal ve theih loh tuikhur te kha a rawn hmu chhuak a, 'Contractor pawh singhnih zet kan mamawh dawn a ni' a rawn ti a ni.

Amaherawhchu, kha chanchinbu kan han en ringawtah pawh khan thil langsar deuh chu an term kum sawm chhung khan PHE tan NEC atangin cheng khat mah an lo pawt chhuak lo a, NABARD atangin cheng khat mah an lo pawt chhuak lo a, Lumpsum grant 10% GBS atangin pakhat mah an lo pe chhuak lo a. A khawi lai ber kha nge ni ang tuma thal ve theih loh tuikhur chu, tiin ka rilru ah zawhna a awm a ni. PMGSY kha a rawn chhuah lai a ni a, a hna kha a lo hlawk deuh bawk a, khalamah khan an in concentrate fai vek ang a tui kha an ngaihtuah hman ngang lo em ni tih te kha ka rilruah hian a rawn awm a. Tin, chubakah PHE changtu khan "E khai! hetianga water

project kan siam vak vak chuan a fel lo ang. A tuizem zawng hian sem ila a tha ang a,” tiin tuizem industry company te kha a din ta mai zawk em ni tih te kha kan rilruah a awm a ni. (in sawi hunah in sawi ve dawn nia, ka thusawi hi pawimawh deuh ania, ‘zawhna hmasa nen a in ang lo’ tih vel mai mai a ni lo). Chumi bank ah chuan dah ila a pung a tam zawk ang tih mai mai kha a ni lo reng reng, ram hnuk thil a ni, chuvangin min lo ngaithla lawk teh u, khawngaih in.

Hnahlan bialah, ka bial chhungah kan lut chawt ang a, Mumte lui project kha kan PHE Minister zahawm tak hnenah kan lo thlen tawh a. Amaherawhchu ‘kumin chu kan han hai phawt ang e’, minrawn ti a. Khi khi kan ngai pawimawh khawp a , min lo chhinchhiah sak se kan duh a. Tunah khian tui kan in daih lova, kan neih chhun pawh khi diesel a awm lo fo mai a, mipuiten pawisa te an thawhkhawm thin a, tun ang renga kan kal a nih khi chuan tui khi kan nei dawn lo hrim hrim a. Thal lain motor in tui min pe thei hram ang em tih kha min han chhanah kan duh a.

Tin, chubakah Pu Deputy Speaker, Champhai hi Pathian zarah kan thang chak khawp mai a, Gosen ruam ang deuh kha kan ni a. Israel fate ang mai khan kan pung deuh thur thur niin ka hria a. 2011 ah mi 32734 kha 2016 ah chuan 42322 in, singkhat dawnin kum 5 chhungah hian kan pung ve hman a ni. Khami a nih avang khan kan tui hi kan daih lo tan khawp mai a. Ruahmanna pawh kan siam a khitah Neihdawn atanga tuirawn chhuk Serlui ah khian. Chu pawh chu kan PHE SE fel tak ten ruahmanna anrawn siam a. Khipawh khi a next ah hi chuan minrawn thailan sak ve thei hram se kan duh a. Vanneihthlak takin ama hmalakna ah tho hian Champhai khawpui chhungah in 2400 chuang zet kan han sa thar leh dawn nen, in min han sak sak ang a, tui kan nei si lo ang tih kha kan hlau a ni. Chuvangin khalai kha min ngaih pawimawh sak hram sela. Tui chungchangah hian kan Minister hi a chak kan ti a, kan Minister neih tawh zawng zawngah hian a chak ber hial ang em, PHE ah hian tih kha ka rilru ah arawn awm hial a ni.

Tin, Pu Deputy Speaker, UD&PA demand no.46 na ah khan han kal ila, a hmalakna hi a chak khawp mai a. Nichina kan sawi ang khan kan bial chhungah hna tam tak arawn thawk a. Pu Deputy Speaker, tunah hian Mizoram khawpui hrang hrangah in 10286 ngawt sa tur approval kan han nei tawh hi ropui ka ti a. A bik takin Champhai-ah chuan in 2400 min approve tawh bakah dilna tunah khian kan la dawn belh mek zel a.

Mizorama in sa tam ber Minister hi a ni dawnin ka hria, hei hi a ropui ka ti a, a kal zel dan turah hian duhsakna ka hlan tel a. Sawi sen pawh a ni lo, a tam lutuk a, chutih ruala ka sawi duh chu Municipal Board hi a Council te pawh hi din ve theih a ni tawh em tih kha nakinah min rawn react leh se tih ka'n beisei bawk a.

Municipal rorelna ang chi hi Babulon sorkar te, Persia sorkar te pawh khan an lo tan daih tawh mai a. Greek City, State kan tih te, Roman ho an vanglaia rorelna tha, khawvel in entawn tlak kan tih te zawng zawng kha Municipal System hian an lo kal deuh vek mai kha a lo ni a. An in relbawl na kha a tha a, thui tak kan sawi lovang. India ram bikah erawh chuan 1600-ah East India Company an lo chhuak a, 1697-ah Municipal kha an rawn din nghal a ni, a pawimawh an ti khawp mai. Mahse India rama an rawn din dan erawh kha chu chhiah lak nan bul an rawn tan kha a ni a, kha kha rilruah a awm a. Tunhnaiah erawh chuan India ram Constitution-in 74th Amendment, 1993 khanin Municipal chu Constitution-ah khan ziak ngei khan a rawn dah ta a, Danpui 12th Schedule-ah a rawn dah lut ta a, tunah hian kan thai deuh thluah thluah a, en na hman chu a awm lo turah kan ngai a.

Article 243 P atanga 243 Z(a) ah khan a kalphung tur leh a system kha mumal takin India Constitution hian a rawn dah vek mai a ni. Mizoram ah thung erawh chuan 2007-ah khan Municipal hi nei turin ruahmanna kan han nei ve tawh a. Tichuan November ni 3, 2010 ah khan Municipal Council hmasa ber Ward 19 nei kha Aizawl-ah hian din a ni ve ta a. Aizawl bakah Mizoram-ah notified town 23 kan nei a, heng notified town 23 te hi LAD leh UD&PA in an enkawl a, buaithlak chang hi a awm deuh fo mai a. Chuvangin a population ina a zawhna hmunah hi chuanin Municipal hi chu a din ve theih tawh mai lawm ni tih ka zawt a.

Municipal Board-ah chuan population mi 5000 chin chunglam an nih chuan Municipal Board kha a din ve theih a, member pawh 5 atanga 9 a dah theih a ni. Municipal Council-ah erawh chuan mipui 50000 chin chunglam an ni a. Member pawh 11 atanga 23 thleng kha awm theih ni a. Municipal Corporation hi chu kan la hlat deuh hlek a, member 3 lakhs chuang nih a ngai a. Chutah chuan 15 atanga 31 kha neih theih bawk a ni. Tunah hian Lunglei sawnin Municipal Council hi population ah 50000 an pelh avangin an nei thei in ka hria a.

Tin, Champhai hian mihring 42322 a neih baw avangin Municipal Board hi kan nei thei in kan hria a. India ram Constitution ah, Municipal hi a that em avangin helai section hi tha kan ti a, Article hian District Planning Committee te pawh hi ruahman turin a zia tel nghe nghe a ni. Chuta a rawn ziah telna ah pheichuan 80% kha Municipal member an ni tur a ni tih kha a rawn tilang leh baw a. Khami District Planning Committee kha state sorkar nen in tie-up a hmasawna kawngah chak leh zuala kal tura ruahmanna pawh India Constitution ah hian chiang deuh in, fiah deuhin a rawn zia fai vek mai a ni. (Khawngaih takin one minute chiah)

Tunah hian kan District zawng zawng hi Pu Deputy Speaker, han en vek ila, beurocrats sorkar hnathawkte kutah hian kan dah tawp mai a, keimahni mipuiin kan thlan lal, mipui sorkar in hmasawna kan khawih theih hun leh hma kan lak ve hun hi kan nghakhlel em em a, dingdihlip in kan thlir a ni. Hetah hian kan Minister zahawm tak hian engchen nge kan kal a, hmalak dan chin te kha nakinah min rawn hrilh theih chuan ka lawm khawp ang.

Vawiinah Sports department hi kan sawi hman ta lova, Sports-ah erawh hi chuan football dawn te pawh hi khat ta deuh hlek tih lai te chauh hi ka sawi lang ang e. Demand no.22, 24 leh 46-na te hi ka support a ni. Ka lawm e.

DEPUTY SPEAKER : Kan duhtaw deuh mai em ni? Fakna lam hlir a ni a. Midang pawh in sawi se an fak leh dawn tho mai a. Sawi tur kan awm loh chuan hun kha tih awl ngawt theih a ni lo a. Pi Vanlalawmpuii.

Pi VANLALAWMPUII CHAWNGTHU : Pu Deputy Speaker, ka lawm e. Vawiina kan demand 6-te rawn sawi ve ka duh a, a hmasa berah chuan Demand No. 22-na Sports & Youth Services chungchang tlem han sawi ve ka duh a. Tuna kan Sports Minister leh a thawhpui Parliamentary Secretary chak takin hma an lakna hi a ropui em em a. Sports stadium chungchangah te Champhai-ah zawh a ni tawh a. Tin, Kolasib-ah te sak mek a ni a Zobawk sports academy, Lunglei ah pawh sak mek a ni a, reilote a zawh tur a ni tih te kan han hria a.

Tin, Serchhip-Stadium pawh zawh tep a awm baw a, hemi ringawtah pawh hian a department changtute leh department a hotute hi fak an phu hlein ka hria a. Tin, infrastructure tha kan neih in, a hrin chhuah kan hre vek ang a, India football team ah te chuan Mizo 4, team 4 ah koh an han ni te hi, kan infrastructure neih thatin a

hrinchhuah a ni kan ti lo thei lo a. Tin discipline hrang hrangah pawh hma kan sawn em em a ni. Kan sawi fo thin angin medal leh award lak tih ang te hi chu he department ah hian ngaiah kan nei thei titih tawhin ka hria a. Tunah pawh Aizawl khawpuiah kan hmu mek a Saron veng a indoor stadium ropui tak peihfel a ni mai tur te, heng te hi a ropui ka ti a. Tin, I-league kan han neih chhan te pawh he department hma lakna rah a ni a, mahni kawtkayah I-league khel kan han en thei ringawt pawh hi mumang ramah pawh kan hmuh phak loh a ni Pu Dy. Speaker. Heng avang hian he department changtute leh a department enkawltu official ho te hi an fakawm hle in ka hria a. Tin, Keitumah khianin indoor stadium kan nei a PWD hian an sa a, tun thleng mai hianin sports deptt. kutah hlan a la ni thei lova, hman a nih hmain a tawl mai ang tih a hlauhawm a, hei pawh hi kan Minister chak tak hian hma min lak pui sela. Sports Deptt. kut a hlan a nih thuai theihna turin kan ngen ve bawk a ni.

Tin, a dawt leh ah demand 25-na PHE department kha sawi leh ta ila. Asia ramah solar pumping lian ber ti a sawi theih, Kelkang water supply scheme te zawh ni in hawn a ni tawh a, Tin, chutiangin Tawngkawlawng water supply scheme te pawh zawh an ni a, heng te hi a ropui em em a, chubakah chuan Saitual ah te Lawngtlai, Khawbung water supply scheme te hawn theihin peihfel a ni tawh a, tin, keimahni bial chhung ngei Biate water supply scheme pawh chak tak a kalpui mup mup a ni reng te hi he deptt. enkawltute chungah hianin lawmthu sawi kan ba a ni, kan ram mipuite hian.

Tin, Aizawl khawpuiah 1986 a hman tawh phase-I pipe hlui lutuk tawh te kha tunah an thar thawh a, pipe thar a thlak an ni mek te hi a ropui a ni. Tin, PHE in tui tih thianghlimna kawnga hmalakna te hi a ropui em em a, YMA nen te a tangkawpin. Theihtawp an chhuah a keini Presbyterian kohran kan ni a, tun Pathianni kalta ah khan kan kohranah chuan, tuihna humhalh chungchang, mipuite tan kan lak a ngaih zia leh sorkar pui turin mipuite kan pawimawhna thute pawh social front atanga hriattir te pawh kha kan ni a, Tiang ang chuanin sorkar deptt. ten a NGO leh kohhran te, tiang anga hmalak pui tur a an sawm te hi a ropui em em a, YMA te an fakawm hlein ka hre bawk a ni.

Tin, thianghlim zawka mipuite kan lo awm theih nan leh kan hrisel theih zawk nan ek in sak te an han buaipui a, open-defecation free-a puan a ni tawh te hi a ropui a, chutiang chuan district tin hian inelna mahni district tinah tih theih tumin hma an

han la te hi a ropui a, hengte hi ram ang a hma kan sawnna ropui tak a ni a. Tin, Kolasib dist. pawn certificate te pawh an lo lak tawh kha, chutiang chuan PHE deptt. hian nasa takin hma a la a ni. Aizawl tui lak chungchangah, Tlawng lui hnar te humhalh an ni a, a hnar humhalh mai ni lovin sangha te thlengin an humhalh a, a hmunah te pawh kan va kal ve tawh a, a thawktute pawh an fakawm ka ti em em a ni Tlawng hnar an enkawl danah hian a thawktute an fakawm hle a ni.

A dawt lehah chuan demand no. 46-na UD&PA chungchang kha sawi leh ta ila. Housing for all hi kalpui mek a ni a, Aizawlah hawn tawh a ni a, district headquarters ah te pawh hawn vek niin notified census town 23-ah kalpui vek tur a ni tih te hi a lawmawm a. In hmun nei si a sakna neilo te tana tanpuina pawisa fai `1,50,000 pek an han ni mai tur te hi a ropui em em a ni, chubakah chuan hmeichhe tan a bik takin hmeithai te, chhumchhia te duhsak bik an han ni leh zel te hi keini hmeichhia te tan chuan thu lawmawm tak a ni bawk a ni. Hemi scheme mai bakah hian loan ang a kalpui tum a ni bawk tih te hi a ropuiin a lawmawm em em a ni. Mi tam tak, hmun nei si, kan nu leh pa, kan pi leh pu atanga kan rochun, a sakna nei si lo heng thil ropui tak an awm te hi a lawmawm takzet a.

Tin, Aizawlah bawlhhlawh paihna tunhma te chuan kan hmu thin a, kan bhavan thlang lawkah te khuan bawlhhlawh paihna garbage trailer kan tih ang kha uih tak maiin a awm hnek hnuk thin a. Treasury square lunlai ah te pawh kan hmu fo thinin ka ring a, khang ang te Department changtuten an han ti bova mipuite nen a pawisa thawh khawm a, hetiang ang bawlh hlawh paihna PPP mode a kalpui mek a ni te hi an fakawm hle bawk a ni.

A dawt lehah chuan demand no. 17-na Food, Civil Supplies & Consumer Affairs chungchang kha sawi leh ta ila. Food security chungchang kan ngaithla fo thin a, a lawmawm em em a, i veilama thu te chuanin hman kan huphurh emawni ti khawpin an rawn sawi chhuak thin a. Hman a nih hnuah, Zoram mipuite chu kan lawm a ni tih pawh kan hria a.

Tin, ration card chungchangah thil pawl deuh mai a thleng a, ration card siam dik loh tam tak a awm a, i veilam a mite chuanin khami chungchang kha world record te pawh an ti a nih kha, khatiang khawp khan deptt. te pawh hian thil tih fel lo

palh te chu a nei thei a. World record han tih rau rauah chuanin CM lo ni tawh ten ka discretionary fund hel tan ka hmang zo a ni, tih ang te pawh kha world record a ni ve tho a ni tih kha ka rawn sawi lang ve kher duh a ni. Tin a dawt lehah chuan gas chungchang, tunhmain kan hria a, bhavan bawh hi kan nitin talna a ni a, tunhma atangin. Nileng zankhuain chain nen a inthlungin gas te kha riah chilhin chan a ni thin te kha mit a hmu ve ngeitute kan ni a. Tunah chuan kan kawtkaiah tuktin mai gas a awm tih thawm kan han hre ringawt te pawh hi a lawmawm em em a ni.

A dawt lehah chuan demand no. 42-na Transport chungchang Rail lu, Sairangah kan han hmu mai turte hi a ropui em em a. Compensation chungchang, kan pu ber kan C.M. zahawm takin compensation hnam kan ni a ti hi a dik em em a ni. Compensation avangin heng te pawh a hunah kan duh angin kan hmuh theih loh phah a, 2019-ah chuan Sairangah rail lu te lut ve thei tawh turin kan economy a lo zangkhai theihna tur leh chhan hrang hrang avangin kan tangkaipuina tur tam tak chu kan sawi seng lo ang a. Hetiang hmalakna Transport Deptt. in an nei hi a ropui em em a ni.

Tin, two-wheeler taxi an introduce te hi a ropui a. Sawi leh thin ila, hmeichhia nihna laiah a bik takin, hmeichhiate tan pawh a he two-whheler taxi permit pek kan ni ve te, hmeichhia te tan a eizawna he department-in min han siam sak ve te hi ka hmeichhiat puite zawng zawng aiawhin a changtu Minister leh parliamentary Minister chungah lawmthu ka'n sawi ve bawh a ni.

Tin, a dawt leh ah chuan, demand no. 43-na, tourism chungchangah tourist lodge kan han privatized te a ropui a, a lawmawm a. Heng avang hian sorkar sum tam tak luangral thin te kha tam tak a save a ni tih te pawh hi lo hre thar leh ta ila. Tin, he department vawiin a kan han sawi tak parukte budget han en pawh hian a lungawithlak hle in ka hria a. Vawiina kan demand 6-a, kan budget-te hi ka rawn thlawp ve a ni e, Pu Dy. Speaker ka lawm e.

DEPUTY SPEAKER : Hun in hmang thiam e. Tunge han sawi leh ang le? Sawi duh kan awm lo em ni? Tumah phar kan awm lova, ka wind-up tir mai dawn asin. Aw le, kan sawihona kan duhtawh a ni ang e. Minister zahawm tak Pu Zodintluanga wind-up turin kan sawm ang a. Aw, in va bei tlai ve, kan sawm tawh a, hei a ding tawh a. Ka hawikual chhung zawngin in phar lova. Heng a demand hi ka'n chhiar chhuak phawt

ang e. Demand no. 22-na, Sports & Youth Services Department - ` 21,56,84,000, demand no. 25-na, PHE Deptt.- te UD&PA Deptt. te hi member-te sawi atang leh tul a tih ang te sawiin... (Dr.K. BEICHHUA : Pu Dy. Speaker, helamah khan an phar reng a i hmu lo a ni). Ka hawikual a ka hmu lo a ni, phar se chu ka hmu em em ang. Tunah wind-up turin i lo sawm ang.

Pu ZODINTLUANGA, MINISTER : Pu Dy, Speaker, ka lawm e. Hei vawiinah ka demand no.46, 22 leh 25-te wind-up tura a awm theih avangin lawmthu ka sawi hmasa duh a. Pathian leh mipui zarah kum 9 dawn lai mai Pu Lal Thanhawla kaihhruai sorkar a lo ding a. Hemi chung hian hmasawna ruhrel tam tak kan ramah a rawn lut a. Hei i veilama thute hian chanchinbute an rawn lek thin a. Hei tukin zingah chanchinbu ka lo hmu ve a, Congress Thalai Headquarters ten a an thuchhuah hi Mizoram mipuite pawhin an hmuh ka ring a. Heng atang ringawt pawh hian tu sorkar-ah hian nge hmasawna ruhrel, tu hian nge hnathawk tih hi a lang chiang em em in ka hria a.

Kan rama hmasawna leh kan ramah mipuite tana hamthatna tur thil a lo thlen reng reng hian Pu Lal Thanhawla kaihhruai sorkar hi a lo ding thin a. Kan hriat theuh angin Pu Lal Thanhawla kaihhruai sorkar-in a hma a lo lak tawhna te, an awm loh karin Tuirial Hydel Project-te, Referral Hospital-te tihchhiat leh tihthuanawpa a awm te pawh vawiin niah siamthat leh mek a ni a. Chutiang chuan department hrang hrangah hmasawna hi a zuan in a zuang a ni.

Pu Dy. Speaker, hei vawiinah kan department, a hmasain UD&PA Department, demand no. 46-na, kan member zahawm tak tak ten an rawn sawi hi ka'n react ang a, a awm lo hi chu ka sawi lo mai ang a. A hmasa berin Pu Sangthuama, member zahawm takin kawng tihchhiat leh SIPMIU tih leh khulaia an tanky chungchang a rawn sawi kha ka'n react ang a.

Hei kawng hi, ni e, hmasawn dawn chuan kawng laih te a ngai a. Kan hriat theuh angin Aizawl khawpui chhunga tui kan supply-na hi kum 30 kalta atanga hmalakna awm tawh te a ni a. Tunah hian Tlawng atanga Tuikhuahtlanga kan tui pump-naa phase 1 kan tih, kum 30 dawn ni tawh hi tun sorkar-ah hian kan Chief Minister zahawm tak te hmalakna in pipe thar hlakin tunah hian kan thlak chho mek a. Chumiin a

a hrinchhuah chu kan hre theuh a, PHE tui a puak, a leak tih hi chanchinbuah a nasa thin a, vanneihthlak takin pawl tam tak a khawih lo a, siamthat leh a ni mai thin a.

He pipe thar kan vuah tawh hnu chuan kum tam tak pipe chhia leh leak-te awm tawh lo turah kan beisei a. Tin, technology-te a lo sang zel a, tuna pipe kan thlakna hi engineer ten pipe an phum hmain a zawmna te an x-ray bakah a pipe hi a tuiiek mai mai lohna tur atan technology thar te hmangin an tuam chhuak vek a. Chutiang chuan hmalak a ni a.

Tin, khawpui chhung distribution hrim hrim hian mipui hi a zo tawh lo hrim hrim a. Entirnan, Tuikhuahtlang atanga Laipuitlang chhohnate, Tuikhuahtlang atanga Dawrpui tanky lian leh Chhinga Veng lampang, tlak lam leh chhuah lam zawng zawng tui pechhuak tur pipe hi a te em em tawh a, mipuiin kan kham tawh lova. Tui hi pump chhuak tam mah ila a distribution line, a feeding main kha a len si loh chuan duh angin mipuite hnenah kan pe thei lo thin a. Chungte avang chuan heng pipe thlakna tur zawng zawng hi SIPMIU atangin ADB loan hmangin tunah hian a thawhna tur pawisa hmuin contractor-te pe tawh in hma kan la mek a.

Pu K. Sangthuama, member zahawm takin a ngaipawimawh em em, tlaklam pawh kha nichina a sawi 7th Day Tlanga tanky lian deuh mai khu SIPMIU atanga siam a ni a. Khu tanky khu tuna pipe line kan neih chuan darkar 36-ah mipui hnenah tui pechhuak lovin khawl ringawt mahila darkar 36-ah kha a khat tawh a ni. Chutichung chuan tlaklam zawng zawng khu khu khuan a chawm a ni si a, mipuite hnena tui pek tur hi a buaithlak em em a chumi siam tur chuan ADB loan atang bawkin pipe lianin tunah hian kan zawmthla a. Hetah Khatla lamah rawn kalin Assam Rifle kaltlangin New Secretariat Complex-ah, khutah Zotlang lamah kalpui a ni a. Tunah hian 90% deuhthaw chu pipe phum hi an zo tawh a. Tun thal chhung ngei hian pipe lian hi luh tir kan in beisei a, chu pipe lian a luh chuan Pu Dy. Speaker, khu tanky lian, darkar 36 a khat thin kha darkar 3 lekah a khat tawh dawn a. Chutiang anih chuan tlaklam mipuite pawhin tui hnianghnar an dawng thei tawh dawn a.

Tin, 7th Day Tlang atangin Luangmualah te, University lamah te pipe thar, pipe lian a thlak mek a ni a. Tin, a bial chhung, Sakawrtuichhun te, Phunchawng te, Rangvamualah te pawh tunah hian distribution line thlun tan mek a ni tih kha member zahawm tak kha ka rawn react duh a. (Pu K. SANGTHUAMA : Khawngaitakin, Pu Dy.

Speaker, Sairang kha a sawifiah theih chuan.) Kha chu PHE atangin ka rawn sawi ang. Tun ami chu UD & PA atanga rawn react a ni a.

Member zahawm tak Pu TT. Zothansanga'n a Municipal Board emaw, Municipal Council emaw din tura hma lakna a tulzia a rawn sawi kha. Pu Dy. Speaker, kum 2007 a he House zahawm taka sorkar hmasa in a Municipal Act a pass ah khan, hmalakna awm hmasa leh ber chu, Pu Lal Thanhawla kaihhruai sorkar a lo din hnu ah, a tak takin kha Act-te kha hman theih tur anga amend ni in, helai Aizawlah Municipal Council din a ni a. Chuta tangin tunah chuan Municipal Corporation-ah tluang takin hlan kai leh tawh a ni a. District capital-ah te hian neih a tul kan ti a, tunah district capital thenkhatah Municipal Board-te, Municipal Council-te an neih theihdan tur hi kan buaipui mek a. Hei hi Law & Judicial pawhin min vet sak tawh a, Cabinet decision turin tunah hian a awm mek a ni.

He Municipal Council emaw, Board emaw district-a kan neih tur hi ngaihtuah a ngai khawp mai a. Mahni ro in relna kan duh laiin, vawiinah chuan kan chawm baw a, kan hawp baw a ni, Pu Dy. Speaker. Nichina kan member zahawm tak tak ten a an sawi ang khan Urban Development atangin hmasawna chi hrang hrang, Champhai bikah chuan, stadium puitling te, tunah mirethei in tam tak kan sa a. Champhai development-na tur atan vaibelchhe sang tam tak, vbc.10 nuai sang tam tak, Urban Development atangin hmuh a ni a. Chutih rual chuan, mipuite inhlawhna tur atan NREG atangin mi harsa tak takin kum khatah ni 100 inhlawhna te an lo dawng ve leh mek baw a. Hengte hi Municipal Board-te kan din dawn a nih chuan mipuiten a an thlan ve thiam emaw, sorkar pawhin engti zawngin nge kan kal ang, rural-urban divide hi kan neih a ngai tawh a ni, tiin Department a kan official-te chuan an ngaihna a rei tawh a. A chhan chu, Delhi-ah te an zuk meeting a, scheme chi hrang hrang kan zuk thehlut ve a. Chutah chuan, hei hi Rural atangin in dawng baw a, hei hi Rural a ni lo em ni? Hei engatinge Urban atangin in dawng baw a tihte an zawt a. Kan official-te leh a bik takin Minister meeting-na a zuk kalte tan pawh hian a zahthlak chang hi a tam em em mai a ni. Chuvang chuan, urban-rural divide hi kan tihfel hma a ngai a. Chutih rual chuan, mipuite hmakhua thlirin, khami khua development tam tak lut si a, a mipui mi harsa, mirethei zawk ten a ni 100 inhlawhna kan neihna tur kan channa tur angte kha a nih avangin fimkhur a ngai hle a.

Tuna official-a kan han propose, nichina Cabinet decision awm tur kha chu Adhoc Municipal Board emaw, Adhoc Municipal Council emaw hi ni phawt sela. Chutah chuan DC-te hi Chairman an ni anga, kan Village Council President-te hi member an ni phawt ang a. Chu chuan tuna ULB Grant rawn kalte leh a theih ang angte bul an lo tan ang a tih te hi vawiina kan han rawt chhin deuh feih feih chu a ni tih kha member zahawm tak rawn sawi atang khan kan rawn react theih ni sela.

Tin, PHE Deptt. ah khan member zahawm tak tak panga in thu an rawn sawi a, a tam zawk chu lawmthu sawina te a ni a. Kan member zahawm tak Pu K. Sangthuama'n a a ngaih pawimawh em em Sairang connection kha ka'n sawi hmasa ang a, tin, Seventh Day Tlang leh Phunchawng-te kha chu UD &PA lampang a nih avang khan ka rawn react tawh a. Sairang Water Supply Scheme khu, ni e, a kal fuh lo laklawh a, Central sorkar atangin a fund release khu a muang em em a. Tunah hian Deptt.-ten theihtawp chhuahin hma kan la a, installment-te pawh pawisa release a ni ta a. Chutah chuan, pipe-te tam zawk neih tawh niin, tunah khuan a pipeline-te phum chhoh mek a ni a. Khu pipeline-ah khuan, a cluster kan ti mai a, mipuiin a tui connection an lakna tur, tui connection an lak a a pekna tur thuam khu a tam thei ang ber dah kan tum a. Tin, cluster kan dahna apiangah khuan, tun dinhmunah chuan public point dah turin ruahmanna kan siam a. Nakinah khuate a lo changkang zel ang a, mipuiin connection an lak tam hunah chuan public point-te hi tihlem turin ruahmanna kan siam a ni tih kha ka rawn sawi duh a. A sanction-te leh pawisa rei tak kan dawn loh te pawh kan hmu tawh a ni tih kha he House zahawm tak hi ka'n rawh hrilh nghal a ni.

Tin, Pu TT. Zothangsanga'n Hnahlan chungchang a rawn sawi kha, a duh ang khan a hmunah Pumte tui lakna tur kha survey-te Deptt. official-ten an nei a. A hmunah an zuk kal a, a tui pump tur khawp chuan Pumte lui kha pump tham khawpin thalah te tui a tam lo tih hmuhchhuah a ni a. Tunah hian gravitation a kan lakna lai khi, thalah pawh tuihna a la tha em em mai a. Khi tuihna khi DONER lamah funding ti turin DPR-te siamin kan buaipui mek a ni tih kha ka rawn sawi tel duh a ni.

Tin, Sports & Youth Services demand 22-na....

Pu TT. ZOTHANSANGA : Pu Dy. Speaker, ka zawhna pakhat chu, tunah khian khawchhunga kan tui neih sa pawh khi 'diesel a awm lo' an ti a, an pe thei lo fo mai a, tui liam pur pur si khian. Khimi harsatna khi kan nei deuh reng mai a. Khi khi

engtingge kan tih theih ang? Tin, thal tak tak a lo ni ang a, motor-in tui min pe thei ang em? Kum dangah pawh khan min pe tho bawk a tih kha.

Pu ZODINTLUANGA, MINISTER : Pu Dy. Speaker, khang an harsatna neihte kha kan lo chhiehchhiah ang a, Office lam atangin a theih ang angin hma lak kan lo tum ang a. Ni e, diesel pump hi a buaithlak khawp mai a, vawiinah hian liabilities hi Deptt. hian a ngah em em mai a. Tui hi a pump loh theih si lohva, current awm loh changin diesel-te hman a ngai a. Heng kan diesel man te leh hemi maintenance-na man hrim hrim hi tunah hian vbc.45 chuang hi liabilities awm mek a ni a, hengte hi Finance Deptt.-ah te pawh hriattir an ni tawh a. Loh theih lohva hman ngai, kan pump loh chuan mipuiin tui in tur an nei dawn si lova, tui in tur an neih loh chuan mihring tan awm ngaihna a awm si lova, khatiang ang te kha harsatna kan neih te zing ami a ni a.

Tin, demand 22-na Sports & Youth Services-ah hian mi pali in thu kan sawi a, lawmthu sawina deuh vek a ni a. Pu K. Sangthuama bialah hian khawthlang lam, tlak lam hi min ngaihthah hi a ti ve fo thin a. India ram leh North East-ah pawh chhuanawm International Standard Cricket Ground khu kan siam zo tawh a, North East-ah pawh a lian ber pawl a ni a. Tin, FIFA enkawl turin Sairang Dinthar ah khuan Sports & Youth Services in a, khawthlang in a ram min pek kha MFA hnenah kan hlan chhawng a, tunah khuan FIFA Academy turin hma lak mek a ni a. Khumi hmunah khuan MFA kaltlangin FIFA in training programme an rawn duang dawn a, chumi hmunah chuan anmahni ta, artificial grass te an rawn phah vek anga, a training leh Mizo thalaite, football lama tui mi leh thiamte, khawlum ni bawk si a, training na tur atan ruahmanna a kal mek a ni tih kha..

DEPUTY SPEAKER : Nawi rawh aw lawk, kan hun a lo tawp a, dar khat a ri a, House kan rawn a ngai a, kan chawl ang a, chawhnu ah a chhunzawm dawn nge, tun ami hi a zo phawt ang a, a nih leh aw, zo law law se.

Pu ZODINTLUANGA, MINISTER : Pu Speaker, ti khan kan react tur ang zawng kha chu kan react zo a ni mai a, hei kan hria a, Sport Department hi mi in luahin rei tak a lo awm tawh a, kum tam tak mai, mahni in leh lo nei lo in kan awm a, chungte chu tunah hian NEC atangin Sport Directorate ang sum hi chu an rawn pe theilo a, amaherawhchu Sports promote na tur atana amalgamated programme angin sanction kan nei a.

DEPUTY SPEAKER : Ngawi rawh aw, Chair kan han in thlak lawk ang.

SPEAKER : Awle, sawi zel rawh.

Pu ZODINTLUANGA, MINISTER : Tunah hian tender process kan buaipui mek a, sorkar GAD lam pawhin sawtah Secretariat Complex hmunah sawn hmun tha tak mai min pe a, hetah hian kan Sport Directorate te leh Sport council te pawh leng vek turin ruahmanna kan siam a, tin, hei UD & PA ah te Department naupang te niin, hmanni lawka din a ni a, chutichung chuan Directorate building tur sak mek bawk a ni a, a mal in Directorate building hi kan nei thuai dawn a ni, tih kha kan sawi duh a, Pu Speaker, kan sawi tawh ang khan kan department chante sawi tur tam tak a awm a, UD & PA ah pheih chuan hmalak hi kan ngah khawp mai a, centrally Aided Project kan tih ang chi, EAP externally aided project te, Asian Development Bank atang te in kan la a. Tin, 10 % lumpsum grant for the North East an tih department zawng zawngin an pawisa an budget atanga 10 % hi North East tan an dah tur a ni tih central sorkar Parliament in a lo pass tawh te hi Department hian a hmang tangkai em em a, hmasawna ruhrel tam tak hemi kaltlang hian Mizoram tan hna an thawk a.

Tin, normal plan fund hnuaiiah te kan thawk a, tin, town and country planning te kan nei a, tin centrally sponsored scheme hi hna khawih tam em em mai a, national urban livelihood mission kan tih NULM te, RAY te, chungte hmang chuan mirethei chawikanna tur programme te kan siam a. Tin, ram pum huap scheme, Swach Bharat Mission te, Smart cities mission te, Amrut te, Housing for all te, National Urban Livelihood Mission hnuaiiah hian hmalakna lian tham tak tak kan nei a, heng hmang hian vawiin ni ah kan ramah pawh Pu Speaker, hmalakna ruhrel thalaite leh kan tu leh fate lo kal zel turin an lo chhawr tur ang kan siam nasa em em a, nimin lamah pawh kan lo sawi tawh Aizawl khawpui chhungah ngei mai, VVIP te an lo thlen leh Convention an rawn neih a an thlenna tur te meeting hall hmun leh hmunah an neih theihna tur Convention Centre khutah kan sa mek a.

Tin, tun financial year tharah chuan mipui pun khawmna tur YMA General Conference an neih te, kohhran thalai pawl leh kohhran te pawh in Conference emaw, inhmuhkhawm an neih tuma len vekna tur, political party pawhin Assembly kan neih tum pawha khawpui tibuai tawh lo a kan len theihna tur ang chi tunah hian ruahman mek a ni a, chungah chuan mi singkhat leng thei tura hisap a ni a, chungte chu Pu Speaker,

kan neih theih hunah chuan kan thalai, infiamna lam ringawt a tuilo, zai lama tui mi te pawhin an talent te an show theihna tur leh khawvel pum huapa mithiam te, concert te pawh an chah chhuah duh chang a, an chah chhuah huna an perform na tur hmun kan siam te a ni a.

Tin, hmanni lawkah Zodin Cinema Hall chu sorkar in a lei a, tunah hian a design te competition siamin architech mi hrang hrang hnen atangin lawmman te kan pe a, kan duh ang kan thlang tawh a, chu kan thlanah chuan automated parking tih a ni a, sawlai hmunah sawn parking motor tam tak dah theih bakah a chungah thil hrang hranga mipui vantlangin an hman theih tur design chhuah a ni a, saw automated parking ah sawn tuna design angah chuan motor hi kan va tlan lut ang a, smart card ang khan kan dah ang a, kha khawl khan motor kha amah in a park vek ang a, kan chhuah leh duh hunah kan card kha kan va hmet leh zeuh ang a kan motor kha a rawn chhuak leh mai dawn a ni. Chutianga changkang chu Pu Speaker, kan ram kan khawpuiah hian siam kan tum ve mek a ni tih kha kan rawn sawi duh a ni.

Tichuan Pu Speaker, ka Demand No.22 Sports & Youth Services Department ` 21,56,84,000 leh Demand No.25 na PHE Department ` 1,97,41,29,000 leh Demand No.46 UD &PA Department ` 3,65,61,43,000, a vaiin ` 5,84,59,56,000 hi he House zahawm takin min pass pui turin ka rawn ngenin ka rawn sawm e.

SPEAKER : Awle, tunah khan kan Minister zahawm takin Demand No.22, 25,46 hnuiaia department pathum Sports & Youth Services Department, PHE Department, UD &PA Department in a kum 2017 – 2018 chhunga an pawisa hman tur a vaia belhkhawm ` 5,84,59,56,000 hi he House pass pui turin a dil a, Pass remti zawngin ‘Remti’ ti ru le. (Members : Remti) Remti lo kan awm em? Awm lo. tichuan Demand No.22,25 leh 46 hnuiaia pawisa hman tur a vaia belh khawm ` 5,84,59,56,000 chu he House hian lungual takin a pass ta a ni e.

Pu ZODINTLUANGA, MINISTER : Pu Speaker, ka lawm e.

SPEAKER : Awle, kan chawl rih ang a, nakin dar 2:00 ah kan kal khawm leh dawn nia.

(2:00 PM)

SPEAKER : Thu ang le. Opposition lam hi an lo la kal lo. Le tunah chuan kan Minister zahawm tak Pu Zodintluanga kha kan pass tawh a. Pu John Rotluangaliana Demand No 17-na, 42-na, 43-na, hei hi sawihona kha a tawp tawh a. Minister zahawm takinrawn wind-up sela, passrawn dil nghal tawh sela, amah i sawm ang.

Pu JOHN ROTLUANGLIANA : Pu Speaker, ka lawm e. Hei vawiin chu sawituan tam vak lova. Kan hriat ve chinah chuan demand sawi nia kan sawi tlem bertum a ni awm e. Tun hma chuan dar 10:00 te kan thleng thin kha nia, tlai chawte kha kan ei a, khawvel a changkang tawh a ni ang e.

Engpawhnise Pu Speakerm, ka Demand no. 17-na, Food, Civil Supply and Consumer Affairs hi ka han sawi hmasa ang a. Member zahawm tak pathumin an sawi a, amaherawhchu memberte sawiah hian han react em em tur a awm lova. lawmthu sawina a ni a. Member hetilaia lawmthu sawitute hnenah pawh lawmthu ka sawi let a. Tin, kan member zahawm tak Pu Sangthuaman khuti laiah 2 kg an cut, retailer tih vel kha chu; hei hi Department lampang pawh kan han zawt a, complain pakhatmah kan hmu lova, complain hi eng thilah pawh hian ni sela, sorkar lamah hian complain thin sela, opposition member lamah ni lo hian. Chuan keini tan pawh action lak a awl zawkin ka ring.

Tichuan Pu Speaker hei kan inruahman nasa ve ang reng si a an sawi tawiang reng si a, han tih viau pawh chu a inthlahrunawm letling angreng a. Engpawh ni sehun ka ngah zawkah ngai mai ila, kan ti par par ang e.

Supply centre te hi hmun thenkhat kan khar a, anmahni khua chauhva kudam awmte an nih avangin. Amaherawhchu hmun thenkhatah kan hawn belh a. Chungte chu hei Silsuri leh Rawpuichhipah te hian Supply Centre te hi kan hawn belh a, anni hian an chhehvela khuate an chawm theihna turin kan ti a ni. Tichuan heng kan Supply Centre-te hi tunah chuan in hriat theuh angin Pu Speaker, buhfai hi a buk hi a inang lo nasa khawp a. A lo thleng chiah hi buk ila, a chhuak leh tur pawh buk ila, a inang chuang lova. Tlem tlem hian a sawt deuh reng mai a ni. Chuvang chuan theihtawpin, kan Officer lamte pawhin tan an la a. Hun reiloteah hian Digital Weighing Scale, 30 qtls buk theihna hi Supply Centre tinah hian dah nisela kan ti a. Chutiang chuan tunah hian hman la mek a ni tih kha kan sawi duh a ni.

Nichinah khan member zahawm tak Pi Vanlalawmpuii khan Bairabi rel chungchang te a rawn sawi a. Hei hi Bairabi-ah hian ni e, broad gauge rel a lo thleng tawh a. Tichuan Bairabi atanga Sairang lo chho tur pawh khuan tunah khuan hma lak mek a ni, khuti laiah Bairabi-ah khuan buhfai a lo thlen hian FCI te khuan an buaipui khawp a tunah khuan FCI-in Godown lian an la neih loh avangin rel atang khuan rang taka unload zung zung a ngai a. Darkar kua chauh hi rel an ding thei a. An ding thei ti ila a free-in, darkar kaw hnuah kha chuan an din man kha FCI hian an chawi zel a ni. Engpawhnise tunah rih chuan harsatna em em an la tawh lova. Tin, Bairabi leihlawn kan tih khu khumi khawthlang lampang, Saikhawthlir lampang kalna tur pawh khu thla thar April thla te hi chuanin hawn theih an inbeisei a. Khumi leihlawn a rawn chhuah phei chuani khawthlang lampang keini Mamit District tan chuan kan buhfai thiarna awlsam tein hma kan sawn chho thei ang tih kan beisei a ni.

Tin, hei tunah hian ruah an sur leh tan ta mai a, early monsoon te pawh hi kan nei dawn emaw ni chu aw tih turin kan ngaihtuahnaah a awm a. Chuvang chuan monsoon stock te pawh hi tunah hianin kan dah tan mek a. Khaw 46, centre 46-ah hian monsoon stock hi dah ngai a ni a. Thla ruk chhung tal hi dah nisela kan ti a. 1,24,688 qtls vel dah ngai hian 41780 qtls vel kan dah tawh a. Tunah hian chak takin monsoon stock kan dah mek a ni tih kha Pu Speaker, kan sawi duh a ni.

Tin, ration sem chungchangah hian kan Fair Price Shop-te hi eng nge ni, automation an ti a, tichuan tunah hian ration, retailer te atanga mipui in buhfai an lak zat te, a balance la awm zat te hi online atanga hmuh theih turin siam vek a ni a, hma lak chhoh mek a ni a. Tin, khawnvartui tuna ration anga kan sem ang pawh hi Direct Benefit Transfer Scheme an tih tuna LPG kan tih ang deuh khan tih chhoh tura hma lak a ni tih kha kan sawi duh bawh a.

Tin, hei Ration Card siam chungchangah hian zawhna, House-ah kher lo pawh kan tawng nasa a. Ration Card hi siam that a ngaih changin revision te neih tura tih a ni a. Tin, Ration Card an lo siam that duh hian, Supply Inspector hnenah khan an in report ang a, Supply Inspector te khan an DCSO hnenah an report leh ang a, tichuan Ration Card hi siam that tur a ni a. Amaherawhchu hetilai House kaltlang hian Zoram mipuite hriata ka sawi duh chu Pu Speaker, tunah hian naupang, piang hlim pawh Birth Certificate an neih chuan Ration Card-ah telh theih a ni a, 8 Kg an dawng ve thei tih

kha, naupang pawh puitling quota ang vekin kan pek avang khan kan hmanhmawh thin lutuk a. An sang thla hlawl a, Birth Certificate an la a, Ration Cardrawn siam zel an tum mai a. Hei hi chu a ni em emin ka hre lova. Hmanni lawkah khan in lamah pawh pa pakhat a lo kal a. “Ration Card siam belh kan tum a, hei ka pu, an phal tlat lo mai a ti a,” “Eng nge ni a awmzia” ka ti a. “Hei ka fapain fa a nei ve a. Tunah hian Ration Card-ah a la tel ve lova. Birth Certificate pawh a nei vek tawh a. Hei hi min telh ve leh rawh” arawn ti a. “Thla engzah nge a nih a?” ka ti a. “Thla khat lai a ni tawh.” a ti a. “Ngawi teh chuti em em te chu mawle, lo insum ve deuh ula. Thla khat lek a la ni a, chaw pawh a la ei thei lova. Chuvang chuan chaw a ei theih hunah te pawh, kum khat hnuah te pawhrawn belh ve leh ula. Tun tut tuta belh te chu a dik hleinem mawle.” ka ti a. “Naupang pawhin 8 kg vek an la thei, piang hlim pawhin in ti sia lawm.” a ti a. “Tihte phei chu kan ti a, khangte kha chu a awm chin tawh hi hre ve deuh ula. I tute ei ai ei vek i tum a nih chu.” ka ti a. A tawpah phei chuanin nui chung chuan kan inthlah liam ve leh ta mai a. Chutiang chuanin kan hmanhmawh deuh hlek thin a Ration Card siam chungchangah pawh hianin. Hetiang lo duh hlek hianrawn ti sela chuan, keimahni hian nakinah phei chuan kum chuti zat te kan tiha kan thliar leh, kan inthlit fim loh phei chuan a buaithlak dawn khawp mai. Kan bengvar mah mah deuh hlek a. Kan insum deuh hlek pawh ngaiin ka hria a. Chaw an ei theih hunah khanrawn ti sela a that ka ring.

Pu PC ZORAM SANGLIANA : Pu Speaker, lawk khawngaihin. Minister zahawm tak point of clarification ni sela. Piang hlim thla khat lek emaw lam ni lo khan, centre-ah hian Computer i pe vek tawh tho a. Inspector te awmnaah hian. Heng hmunah hian tih mai ni sela, tichuan DCSO-ah an report ang a, thingtlang hmun hla tak tak atangaration card siam tura Aizawl-ah te leh district capital ah te kal ngai ang ni lo hian sub-centre a inspector te awmna ah hian tih ni se la mipui hian an awlsam phah zawk ang a. Chu chu a tih theih em? Vawiin thleng he harsatna hi thingtlang ten an la tuar em kan zawt a ni.

Pu JOHN ROTLUANGLIANA, MINISTER : Pu Speaker, ka sawilai kha a lo ngaithla fuhlo emawni chu aw ka ti a. Tunah khan ka sawi zo deuh chiah a. Supply Inspector te hnenah khan an in report ang a, anni Supply Inspector ten an bialtu DCSO an lo siamtir ang a kan tih kha, kha kha a ni, kan member zahawm tak khan a lo hriatsual palh pawh a ni maithei e. Aw, DCSO ah khan an lo va kal thin zawk a ni. Supply

Inspector hnenah khan in report a engkim kha an titur ania, tichuan an in (interruption). An lo tir a nih chuan kan lo hrilh tha leh dawn nia Pu Speaker, tir tawh lo turin.

Tin, hei Mizote hi inkhawmpuite leh eng engemaw hi kan ngah a. Chuvang chuan buhfai hi min dil reng mai si a. Kan strict deuh chuan misual nih kha kan hlawh mai bawk si a. Chuvang chuan dan mumal deuh hi siam law law ila kan ti a. Hemi scheme atan hian engngeni, Foodgrain Contingency Scheme kan ti a. Chu chu pawl leh puipun nikhua a mipuiten a buhfai mamawh phuhruk tur a ruahmanna scheme a ni a. Hei hi zirchian mek niin reiloteah hei hi kan siamchhuah theih kan beisei a. Anih loh chuan in hei bial tin maiah hian eng eng emaw khawmpui kan thleng a, chutiang atan chuanin awmze nei zawkin ruahmanna siam ni se tiin hei hi kan kalpui mek a ni tih kha kan sawi duh a.

Tin, LPG refill booking kan tih hi tunah hian hma kan la a. Pilot project atan hian khiti laiah Chalalang a Zoram Indane Service hi hmalak tir a ni a. Local Council te leh tlawmgai pawlte pawh mipuite hnenah dan zir thei turin training pek vek an ni tawh a. Mipui hnenah training an pek zawh hunah, a hman theih tur thu report an rawn tih veleh heng hi hman theih tura ruahman a ni tih kha kan han sawi duh a.

Refill gas chungchangah hian eng engemaw zawhna a tam thin avangin kha kha kan sawifiah nisela. Tin, hei tunah hian kan kudam te hi a panna kawng hi a chhe em em mai thin a. Kudam te hi kawngpui atanga hla deuh hlek, 0.5-1 km ah te a awm thin a. PWD lamah kan han dil thin a, kan kawng a ni lo an ti bawk si a, a buaithlak angreng khawp a.

Chuvang chuan NABARD lamah khan kan dil a, NABARD lamin loan min lo phalsak a ` 10.23 crores hi. Hei hmun 82 ah godown approach road hi siam turin tunah hian a hmunah enfiyahin hmalak mek a ni tih kha kan sawilang duh bawk a ni.

Tin, hetilaiah hian Grant in aid an ti a Govt. of India in. Kudam sakthatna tur rawtna rawn siam ta che u an ti a. Tunah hian kudam sak that ngai tam tak kan neih avangin kudam sak thatna turin ruahmanna kan siam a. Hei hi a project te kan siam zawh hunah khuti lamah kan thawn thla dawn a ni tih kha House kan hrilh bawk a ni.

Tin, hei FCI godown hi keini Department sawn theih hi a ni lo a. Hei hi Food Corporation of India godown a ni a. Amaherawhchu keini ah hian mipuite hian min

bel leh thin a. Min bel takah chuan keini pawh hian nasas takin FCI ho te hi kan nawr ve a ni, kudam sawn turin.

Tunah hian FCI ho hi hmun hrang hrang an rawn offer a, mimal te pawhin. Chungte chu kan enpui a, kei pawhin ka zu enpui tawh thin a. Mahsela rail-fed an ti a; rail station bulah kher khan an duh si a. Rail-fed godown awmna tur hmun hi an duh ang an hmu thei si lo a.

Tichuan Sairang Dinthar ah khuan keimahni Department in ram kan nei a. Hei hi road-fed in ti leh mai rawh u kan ti a, kan han offer thin a. Mahsela road-fed tur hi chuan an duh si lo a. Tunah hian pawisa a kir mai dawn an rawn ti a. Kan pawisa sanction pawh hi a thi dawn an rawn ti thin a. Chuti chung pawh chuanin anmahni hian duhthlan tur hi an la nei tlat lo mai hi a buaithlakna a ni a. Engpawhnisela tunah hian Nghalchawm ramah khuan a awm thei ang a kan ti a. Chungte chu kan en a mahse kha kha rail kawng rawn pel daih tawh a ni a. Chungte chu rail lampang hotuten engpawhnise project report te rawn siam se, engtin tin emaw hmalak dan te a awm lawm ni tiin tunah hian kan innawr vel mek bawk a ni.

Tin, gas bottling plant chungchangah hi chuan anni hi chuan a hmun an hmu tawh a, Sairang Sihhmui ah khuan. Tunah hian 40 acres vel laia zau a ni a. Verification pawh tih vek tawh a ni a. 500 metric tonnes lai awm thei tura ruahman a ni. Tuna kan Mualkhang bottling plant ah khuan 100 metric tonnes chauh a awm theih avangin khu khuanin bur 3,060 vel chauh a pe chhuak thei a, kan khawpkhamlo em em a. Hei hi a lian zawk, bottling plant lian zawk ti turin tunah hian hmalak chhoh mek a ni tih kha kan sawi duh a.

Tin, Legal Metrology hi House-ah pawh hian sawi hi a hlawh lo angreng a. Tunah hian nasa takin kan Legal Metrology te hian hma an la a. Hei gas buk chungchangah te a ni emaw, tin petrol tihdal chungchangah te a ni emaw, leh bukna leh tehna diklo chungchangah te hma an la nasa em em a. Tunah phehi hi chuan gas hi a rit tawh mah mah emaw ni tih tur a nia. Buk hi a tling tha a, an check tha em em a.

Tin, chumi rualin quality control hi Legal Metrology hian an ti nasa a. Kan police lam te leh Taxation lam te nen pawh tanghoin, Mizoram Tobacco Control Society te nen tanghoin cigarette, khiti lam, Burma lam atanga lo lut thin, Bawngkai Cigarette

kan tih mai te kha. Khangte pawh kha danlo a tax chawi lo an nih avang khan an man nasa a. Nikum chhung ringawt pawh khan bawm 1,07,066 lakhs lai an man a ni.

Chutiang chuan hna an thawk a. Tunah hian he Department hi tihchangtlun mek a ni a. Pu Speaker, i bial Siaha-ah pawh tunah hian Legal Metrology Office tur sak that mek a ni a i hriat angin. Tin, Lawngtlai-ah an ti mek bawk a. Serchhip-ah khan mimal in kha leisak niin tunah hian hmalak chhoh mek a ni a. Mamit ah kan sa zo tawh bawk a. Chungte chu reiloteah an function theih kan beisei a ni. Tin, Legal Metrology hi tunah hian NEDP hnuai-ah hian 2016-2017 ah khanin cheng nuai 25 lai min pe bawk a, heng hi hmanrua tangkai tak tak te lei nan kan hmang thei bawk a ni tih kha Pu Speaker, ka han sawi duh a. Sawi tur a tam a, mahse kan sawi vek lo mai ang a, kan opposition te an tin deuh tan der tawh mai si a, churang chuan Food & Civil Supply-ah chuan ka duh tawh mai ang a.

Pu Speaker, demand 42-na Transport hi member zahawm tak tak pali lai in an sawi a, lawmthu sawina lam deuh hlir a ni a, lawmawm ka ti a. Transport ah hian an sawi ang khan Two Wheeler kan introduce a, tunah hian 24 registration an awm tawh kan tih kha. Hmeichhia te hian hmeichhia chauh phur sela kan han ti deuh a, a chhan chu engemaw venthawn thilah khan hmeichhia te hi mipa te hian an lo hire ang a, thil fel lo te a awm ang tih te kan hlau a. Amaherawhchu tunah chuan kan han sawiho leh a, hmeichhia pawhin mipa pawh an phur thei ang a, mipa pawhin hmeichhia te an phur theih ang kan ti a, chutiang chuan zau takin kan hawng leh ta zawk a ni tih kha Pu Speaker, he House hi ka han hrilh duh a. Tin, Aizawl rawn lut si lo in, Aizawl leh a chheh velah hian Auto Rickshaw hi introduce ni sela kan ti a, Zemabawk, Thuampui rawn pel lovin, khitah, Durtlang Leitan rawn pel lovin, he lamah Melthum lam ni bawh se la, Khulamah Saikhamakawn ni bawh sela, chutiang chuan Auto rickshaw kan ti thar a, an tangkaipui em em mai a, a lawmawm ka ti a. Khulamah Ramrikawn kan, chutiang chuan hma kan la a, mipuiin an tangkaipui em em a ni. Tin, complaint tam tak, keimah mimal paw'n ka lo dawn ve thin, taxi permit a thar kan pe lo in ti si a, taxi registration a thar a awm reng mai, an rawn ti a, hengho hi replacement kan phal avanga number thar pek an ni tih kha ka sawi duh bawh a. Tin, chumi rual chuan Taxi permit hi Aizawl khawpuiah kan pe lova, a chhehvelah kan pe a ni. Session hmasaah pawh ka sawi tawh kha, Lengpui, Saitual leh Aizawl chhehvel ah Taxi kan han pe a, registration an rawn

tihna hi Aizawl tho ani avang khan, MZ-01 ang khan a kal leh a, khangho kha Aizawl Taxi ni lovin, Aizawl registration rawn ti ve si an ni tih kha ka'n sawifiah ve leh duh a.

Tin, member zahawm tak Pu Zawma paw'n a rawn sawi kha, kan Aizawl DTO hi an hah lutuk a, a bial a zau lutuk a, chuang chuan lirthei registration hrim hrim hi average in nitin 26 awm ang vel a ni a, chumi piah lamah chuan tax rawn pe ti vel buai nen, chuang chuan Aizawl DTO hi hmun hnih a siam ni se kan ti a, chu chu tun financial year tharah hian kan tih theih vat kan beisei a, chu chuan Aizawl AMC enkawl tur bik area hi siam ni se kan ti a, chutiang chuan Pu Speaker, hmalak a ni tih kha ka han sawi duh a. Tin, tunah hian automated vehicle inspection & certification centre kan ti a, South Hlimen ah sawn dah turin ruahmanna siam a ni a, hei hi MORTH (Ministry of Road Transport & Highway) ah dil a ni a, DPR pawh siam vek nih in thehluh a ni a, a thuphung chuan min approve sak tawh a, vaibelchhe 15.50 ani a, hei hi MORTH in an duh dan angin, CIRT, Pune in a project pawh hi an rawn siam vek a ni. Hei hi reilote ah sanction kan hmuh ve kan beisei bawh a ni. Tin, MORTH lam atangin, MORTH kan tih hi (Ministry of Road Transport & Highway a ni.) He mi National Highway Accident Relief Service Scheme hnuaiah chuan Ambulance panga lei na min rawn pe a, tunah hian panga kan lei a. Hei hi kan member te pawhin an hriat atan leh in duh a in hman theih turin tunah hian ruahmanna siam a ni a, kilometer ah cheng 25 kha a ni a, chu chu a hman theih a ni tih kha Pu Speaker, ka han sawi nghal ni sela.

Tin, Deluxe Bus hi state sorkar in pathum lei na tur min pe a, chu chu tunah hian kan lei tawh a, Ordinary Bus hi lei tawh a ni a, kan Delux Bus hi tunah hian uluk takin Assam-ah a body siam tir ani a, sorkar kum tharah hi chuan tlantir ve theih kan in beisei a ni. Tin, Chaltlang-ah khian petrol pump kan nei a, (MST hmun ah khian) kan pump hman dan hi a nuihzathlak ang reng a, consumer pump a nih hi chuan, retail outlet pangai ai hian a man a lo to tlat mai a, chuang chuan retail outlet ami te kha a trip in kan lei a, kan chhung chhawng a, kan chhung chhawn khi kan hmet chhuak ve leh a ni. Chuang chuan retail outlet a min le sak turin IOC lamah ka dil mek a, min convert sak thei turah kan ngai a ni. Tin, kan Directorate building hi kan PWD ten min sak sak a, 99.9% vel chu an zo tawh a, reiloteah min hand over ang a, kan luah ve theih mai kan in beisei a ni. Kan PWD lamah pawh lawmthu kan sawi a, reiloteah office thar kan nei ve turah kan inngai a. Tin, internet connectivity kan ti hi, DTO Kolasib te, Serchhip te,

Aizawl leh Champhai ah te hian kan dah tawh a, hmun hrang hrangah dah tum a ni a, amaherawh chu, radio wave internet connection a nih loh avangin hmun thenkhatah chuan harsatna kan tawk thin a, radio wave internet connection hmang vek tura hmalak chhoh mek a ni tih kha ka sawi ve leh duh bawk a.

Tin, Road Safety Council tih hi Supreme Court in a rawn ngai pawimawh a, Supreme Court order angin Mizoramah pawh hian Road Safety Council din a ni a, chumi hnuaiyah chuan Lead Agency pawh tunah hian din a ni tawh a. Kan hriat angin, road accident ah hian mihring kan thi tam em em a, hei hi India sorkar pawhin a manganpui a ni. Mizoram hi a thi tlem ber pawl zawk kan la ni a. Nikum khan kan record chin ah chuan mi 70 in nunna an chan a. Hei, kumin pawh, thla 3 chauh kan kal a, mi engemaw accident a thi an awm leh tawh a, ni 5 danah pakhat zel thi ang kan ni a. Chuvang chuan, ngaih pawimawh a ngai a ni kan ti a. Chuvang chuan Road Safety Council hi din a ni tih kha ka han sawi tel bawk a ni. A zawng zawng kan sawi seng lo ang a, Pu Speaker, kha kha Transport lamah pawh duh tawk mai ila.

Tourism lamah pawh hian, member zahawm tak tak mi 3 in an rawn sawi a, tawi te te-in ka han sawi mai ang a. Kan member zahawm tak Pu Vanlalzawma khan, MIFCO theituite hi zawrh theih ni se Tourist Lodge ah hian, a ti a. A har lo kha kha chu, kan lo tum dawn nia. Tin, Mizo chaw leh chawhmeh lam te pawh hi mite pawhin an ei chak ang a, a ti a. Khangte pawh kha kan thiam zawng tak a ni a, kan lo ti dawn nia.

Tin, privatization chungchangah khan sawi duh tlem ka neih chu, tunah hianin tourist Lodge 12 hi kan privatized tawh a, a rate te a in-ang lova, a then a sang lutuk a, a then a hniam lutuk a, a ti a. Kha kha chu open tender-a tih a ni a, a sang ber zel kha kan la a ni. Chuvang chuan kha kha an rate a ni a. Tin, thenkhatte chu tlawm te te-in tih kha, tourist lodge chhe tawh lutuk, ngaihsak theih tawh loh/enkawl thei tawh loh te kha an ni a. chumi rual chuan thenkhatte phei chu chhangtu hmuh miah lohte pawh kan nei a. Hmanni ah khan Saiha district-ah 7 lai kan va hawn belh a, khangte pawh kha chanchinbu-ah te pawh an rawn ziaa. A then privatized mek laia, a then hawn belh, an ti a, a dik tho mai. Amaherawh chu kan commission ve phawt loh chuan han privatize tur pawh khan a tih hleihtheih lova, dan zawh kim nan kan han hawng ve phawt a ni, hawn loh pawh kan la ngah mai ka pu. Tourist Lodge lampang hi tunhma atang khan an lo uar ang reng a, dai ah hian an lo sa deuh zel lehngal a.

Hmanni te pawh ka pu, i bial ah Lawngmasu kan va thleng a, chutah te pawh chuan Tourist Lodge te an lo sa ve a, Lawngmasu-a sorkar building awm chhun te pawh a ni mahna, chutiang chu a ni a. Engpawhnisela hemi privatization chungchangah hian hma kan la chho zel a, an duh chuan kan tender leh zel dawn a. Tin, Council hote pawh hi 'in council chhung ami chu min lo lak sak mai teh u' ti te pawhin ka va request tawh a. Amaherawhchu, anni pawh sawn an cho bik chiah lova, Chawngte bik em ni erawh chu Council ho in kan lo la ang e an ti a, Pathian zara kan dam chuan 6th April hian va pheih a, 7th April-ah in hand over a, Chakma Council hnenah hlan kan tum nghe nghe a ni. Khatiang khan hmun dang ho pawn min lak sak thei se kan duh em em a ni tih kha ka'n sawi lang duh bawk a ni.

Tin, Tourism Department-in kan buaipui em em mai chu Central sorkar-a thuneihna a lo in thlak takah khan kan department-in project kan kal pui mek Project Development for Destination and Circuit kan tih PDDC kan tih hi min de-link ta tlat mai a, engemaw chen kha an rawn release a, tichuan hna te pawh kha tan an ni nak nak a, mahse, an han tih tawp takah kha chuan kan mang ang a pawisa a lo kal tawh bawk si lova, kan Chief Minister zahawm tak hian Prime Minister hnenah lehkha min ziah sak a, kei pawhin a hminga Minister ka nihna angin Central Minister pawh vawi thum ka zuk hmu a, tin, DoNER lamah te pawh kan kal a. DoNER Secretary-in in ngaih pawimawh zual te chu lo phuhruk che u kan tum ang an lo ti a, kan ngaih pawimawh zual te kan han thlang chhuak a, mahse, a tawpah engmah phalna Finance lam atangin kan hmu leh lo an lo ti leh a, ti hian kan tawp ta ringawt mai a. Tunah State sorkar-ah te kan thehlut a, kan hotuten a zawng zawng min tih sak theih loh pawn a ba chin tal te hi chu min han tih sak thei se tih kha ka'n sawi nghal duh a ni.

Tin, tunah hian Pu Speaker, central sorkar-in scheme a rawn siam thar Swadesh Dhasan hnuaiah hian 2015-2016 ah pawh khan kan sorkar-in matching share tih ngai miah lo khan Central sum in tourist infrastructure chi hrang hrang siamna turin ruahmanna a rawn siam a, chu chu Integrated Development of New Eco -tourism under Swadesh Dhasan North East Circuit tih ah pawh khan vaibelchhe sawmkua leh pali leh point pakua bial min rawn sanction a, tunah hianin vaibelchhe sawmli pasarih leh point pali panga pahnih pariat hi min rawn release tawh nghe nghe a tunah hian hma lak mek a ni a, Thenzawl, Reiek leh South Zote-ah te. Tunah khuanin Reiek-ah khuan Tourist

Convention Center siam a ni a, khu pawh khu final bill kan la pe lova, NEC-in min tih sak a ni a, final payment pawh hi min rawn pek thuai kan beisei a ni. Chutiang ang chuanin tunah hian ruahmanna chi hrang hrang siam a ni.

Kan hriat theuh angin Tourism Department hi a leh lamah chuan hma in sawn lo pawh an ti maithei, hma sawn a har na chu engmah nei lo atanga thil siam tum kan ni a. Mi ramah chuan Fort hlui tak tak te, sakhaw hmun pawimawh tak tak te an nei a han tlawh tur hi, keini chuanin khatiang ang kha kan nei ve lova. Chuvang chuanin hmun pawimawh siam chhawp tur hian ruahmanna kan siam a, hma kan han la a. Thawh chak erawh a har khawp mai, tunah hian project kan han siam a. A thu phung chuanin kan project siamte chu min han approve tawh a. Mahsela, sanction tak tak kan la hmuh loh avangin heti laiah hian kan sawi lang chiang ngam lo a ni.

Tin, hei kan sorkarin tun 2016-17 ah khan hemi NEDP hnuaiyah hian vbc. 1 min pe a, chu chu home stay an ti a, chu chu mikhual lo thlenna turin a ni a, ram dang atangin mikhualte an lo kal ang a, kan ram an enin kan pi pute sulhnu te pawh an rawn en duh ang a. Chutiangah te chuan riahna te a awm lo thin a, an inah room khat an lo siam sak ang a thlen in tur. Tichuan bathroom tha takte, inbualna te, inthiarna tha takte an lo siam theih nan chutiang chuan ruahman a ni a. A bikin Champhai lampang khi pi pute sulhnu han awmna deuh anih avangin a khua pawh kan han thlang deuh bik a. Vangchhia te, Vaphai te, Chawngtlai, Dungtlang, Hnahlan leh Zokhawthar te hi hetiang tihna atan hian a tha ang e tiin tunah hian ruahmanna kan siam mek a ni tih kha ka sawi theih tawk ni mai sela.

Khi darkar chanve lai ka sawi tawh a, ka duh tawk tawh dawn mai ang a, ka demand no.

17	Food, Civil Supplies & Consumer Affairs	2,55,28,70,000	180-190
42	Transport Department	43,80,41,000	496-505
43	Tourism Department	15,32,19,000	506-513
	TOTAL	3,14,41,30,000	

te hi he House zahawm tak hian min pass pui turin ka rawn dil a ni

SPEAKER : Kan pass hmain ka Deputy Speaker hian clarification rule siam lawk a duh a khawngaih, amah sawm hmasa ila chumi hnuah kan pass dawn nia.

DEPUTY SPEAKER : Pu Speaker, ka lawm e. Hei chawhma lama chair-a ka thut laiin sawihona hun tihtawp a ni a. Kan tih tawp chhan kha han sawifiah lawk ka duh a. Member te ka enkual a, sawi tur in awm tawh lo em ni ka ti a. Vawi engemaw zat ka tih hnu ah Pi Awmpuii a rawn ding a, ka sawi tir leh a, chumi hnuah a sawi zawh hnuin hun a la awm a, kan chawlh a la hun lova, sawi duh in la awm em ka ti a. Mi sawi duhlo chung sawi tura inngah tlat kha kan tih tur pawh a niin ka hre lova. Tichuan, tumah an phar bawk si lova, hun a la awm bawk si a. Chuvang chuan, Minister kha wind-up turin kan sawm mai ang a ka ti a, a rawn din tawh hnuah helam i veilam atang hian, kan phar alawm i hmulo a nih kha an ti a. Kei chu ka hawi kual ka hawi kual a, an phar miah lo. Hun ka pek chhungin an phar miah lova, tichuan Minister a ding tawh a, thut tir leh kha chair atang chuan a nuam tawh lo a ni.

Chuvang chuan, sawihona ka tihtawp chungchangah khan tih dik loh ka neih ka hre lova, House zahawmna vawn tur. Opposition chauh kha lo sawi duh si ding lo an ni lova, Ruling lam atang pawh in kan chhun chawlh hnu ah, ‘keipawh sawi ka tum ve a sin mawle, kan tawp ta mai si a,’ an ti a. Mahse, an din lohva an phar miau si loh chuan mi rilru kan hre si lova. Deputy Speaker kan nih avangin mi rilru leh an tum dan kan hre si lova. Chuvang chuan, hun ka pe a, khatih chhung khan an phar lova, ka hawi kual ka hawi kual a, Minister ka sawm tawh hnuah a din tawh hnuah an ding chauh a ni.

Chuvang chuan, opposition te ngaih pawimawh lohna emaw member-te zalenna nek chepna emaw a nih ka hre lo a ni. Chu chu a ni a, chawhma lam khan Group Leader-in Committee te kan nei a, chhuah hma te kan duh a ti a. Chuvang chuan, tunah pawh Assembly Session lam ai chuan party committee lamah an kal ta dial a nih ka ring ta mai a kei chuan. Pu Speaker, i remtih nain wind-up chungchang kha han sawifiah ka duh a ni. Ka lawm e.

Pu R.ROMAWIA, MINISTER : Han sawi ve lawk ka duh a, House hi tluang takin kal sela, member te pawh inpumkhat tlang hian thu sawi ila tih

kan duh a. Kan Deputy Speaker kha chair a nih laia a sawi dan kha thil dik a ni. Vawi duai lo ‘sawi tur in la awm em’ a ti a, ban phar pakhatmah an awm lova an awm tak lovah chuan Minister kha windup turin a ko ta a ni tih kha thu dik a ni tih ka rawn sawi duh a ni. Ban phar an awm lo a ni tih kha kan hriat a tha a ni.

Pu LALRINLIANA SAILO : Pu Speaker, keimahni memberte thiamloh a ni, keini pawhin sawi kan tum a, mahse kan lo inthiar lai a ni a, chair atanga ‘sawi duh in awm em’ tih lawm lawm laia kan awm loh miao chuan a sawi kha a dik a ni.

SPEAKER : Nimin kha kan ang lek lek a, mahse nimin kha chu windup programme ang kha kan lak a ngai dawn a BAC in a thurel tawh tlem a bawhchhiat a ngaih dawn avang khan kan han ti hram hram kha a ni a. Vawiin ah ka office-ah an lo kal a, ‘i hruaina hnuaiah chuan kan lung a, awi a kan lawm khawp mai. Mahse Deputy Speaker hi tlemin a strict lutuk a ni an ti a. Mahse hei ka chairman na hnuaiah pawh an awm chuang si lova, kei pawhin biahthu der maw min lo hlan le ka ti ve tho a ni.

Awle, Pu John Rotluanglian an a department pathum a pawisa hman tur pawisa a zavaia belhkhawm `3,14,41,30,000 pass pui turin a dil a, pass remti zawng remti ti rawh ule. (Members : Remti) Remti lo kan awm em? Kan awm lo.

Tichuan demand no.17,42,43 2017-2018 chhunga pawisa hman tur a zavaia belhkhawm `3,14,41,30,000 chu he House hian lungrual takin a pass ta a ni.

Vawiina kan tih tur chu kan zo va, kan chawl rih ang a, naktuk zing 10:30 a kal khawm leh turin i haw rih ang u. Sitting is adjourned.